


NSAMBULU YA JEZABEL

 Beto telama kaka mwa ntangu kaka fyoti, na yina beto ke pesa matondo na Nzambi samu na yayi. Beto kukulumusa bayintu ya beto.

Tata Nzambi ya Santu mpe ya lemvo, beto kele na kyese mingi ti Nge kele Nzambi, mpe lusalusu yina kele kaka na ntangu ya mpasi. Beto ke tonda Nge samu na yina Nge me sala samu na beto. Beto lenda kaka ve kutuba, na bantima ya beto, mutindu beto ke sepela na yayi, mpe mutindu Nge ke kwizaka na kusadisa beto ntangu beto kele na mpasi. Beto longokaka, na bamvula, na yasala kivuvu na Nge mpe na kukwikila na Nge.

Mpe mu ke sambila, na manima ya midu yayi, Mfumu, ti Nge ke mwangisa balusakumunu ya Nge na zulu ya bantu yayi. Ti ya vwanda ve na muntu mosi ya kulemba na kati ya beto ntangu lukutakanu yayi ke suka. Kana ya ke vwanda na mosi awa yina kele ve ya kusungama na Nzambi, bika ti Ngolo yina vumbulaka Yesu na ntoni, kupesa banzutu ya bawu yina ke kufwa ngolo, Mfumu, mpe moyo ya bawu, mpe vutula bawu na Nge. Pesa yawu, Mfumu. Bayina kele na Mpeve-Santu ve, ti yayi kuvwanda kilumbu mosi ya nene yina bawu ke zimbana ata mbala mosi ve, samu ti ya vwanda kilumbu yina Nzambi ke mwangisa Mpeve ya Yandi na zulu ya bawu. Pesa yawu, Mfumu. Lemvokila masumu ya beto.

Beto ke sambila ti Nge kusakumuna Mpangi Sullivan, nkundi ya beto ya luzolo mpe ya ntalu, mpe mabanza ya yandi samu na bantu, mpe samu na yina yandi ke meka na mutindu nyonso yina yandi lenda, na kusadisa bawu. Mu ke sambila ti Nge sakumuna Mpangi Sullivan.

Sakumuna milongi bisika nyonso, na yinsi. Pesa bawu na mutindu ya kukondwa kusuka mpe ya kulutila, Mfumu. Ti bawu telama na ngolo nyonso na chaire mpe kusamuna Ndinga ya Nzambi, samu ti beto ke na kuzinga na bangunga ya nsuka ya masolo ya yinza yayi. Bika ti mambote ya Nge kufika beto na bantangu yayi. Samu ti beto me lomba yawu na Nkumbu ya Yesu. Amen.

Beno lenda vwanda.

Mu ke vutula matondo mingi na beno mutindu, na Nzambi, samu na yayi. Mpangi Sullivan yandi mosi kubakaka yawu na zulu ya yandi. Beno me mona, ya ke vwanda ve ya kulunga ti Mpangi Sullivan kusala yawu, na yawu beto kukubamaka samu na kubongisa yawu. Beto ke tonda nge samu na bumbote ya nge.

² Mpe, ntangu yayi, samu na dikabu ya zola, yawu... beno zolaka sala yawu ve. Ve, ya vwandaka mfunu ve. Beno me mona,

kaka . . . bawu futaka mbongo, hotel, mpe yina beto kudyaka, mpe ya kele kaka nyonso yina vwandaka mfunu. Kasi matondo na nge, na mutindu nyonso, mpe ya ke kwenda samu na kusadisa ba-missionaire mpe kunata bantu na Nzambi. Ba ke sumba ata tabaka mosi na yawu ve, ata whisky, ata kima ya yimbi, ya ke kwenda samu na kima ya mbote. Mpe mu ke sambila ti Nzambi ke tula yawu na ndambu ya nge na zulu kuna, mpe kufulusa yawu bambala kumi ya mafunda, konso dollar, to—to pata, to ba-cent yina nge me pesa samu na kusalu yayi.

³ Mpe, ntangu yayi, mu ke zola kutonda Basoda ya Etats-Unis na kupesa beto muswa ya kuvwanda na yinzo yayi, samu na kuzwa balukutakanu yayi. Kieleka mu ke tonda bawu na ntima ya munu nyonso.

⁴ Mpe mutindu mu me bakula, Mpangi Sullivan tubaka ti ba ke futa kaka bima nyonso. Beto ata mbala mosi ve me bikaka ntete mbanza, na mfuka ya pata, kasi nyonso ke futamaka; beto ke kwikilaka kaka ve na kima yankaka. Beno fwana defa muntu ve, beno fwana vwanda ya kusunguma mpe kieleka. Mpe kana nge ke defa muntu, kwenda tala bawu mpe tuba na bawu ti nge ke defa bawu, kasi ti bawu kupesa kaka nge mwa ntangu fyoti, mpe nge ke futa yawu. Beno me mona? Ntangu nyonso, ya kele mbote mingi. . . Yina kele kidimbu ya mbote ya buklisto: kuvwanda ya kusungama, kieleka.

⁵ Beno fwana zinga kaka yina beno ke zonzila. Kana beno mosi ke zinga yawu ve, wapi mutindu beno ke vingila muntu yankaka kuzinga yawu, beno me mona. Na yawu beno kele mikanda ya kusonama, yina bantu nyonso ke tanga, na yawu beno vwanda ntangu nyonso ya kusungama, ya kudedama, kieleka. Beno tuba kieleka, ata mutindu yimbi ya ke sala mpasi. Beno tuba kieleka, na mutindu nyonso, samu ti beno lenda tuba ntangu nyonso mutindu mosi konso ntangu. Mpe kana beno tuba luvunu, beno fwana baluka mafuku ya bakilometele, mpe dyaka kuvutuka dyaka na luvunu yina; mpe beno ke sala kaka kuna kima mosi ya yimbi. Beno vwanda kaka ya kusungama, mpe beno lenda ntangu nyonso kutuba yawu mutindu mosi samu ti ya kele kieleka.

⁶ Yina kele mutindu na Biblia. Beno tuba kaka yawu mutindu Biblia me tuba yawu, beno vukisa ve kima na yawu, beno tuba kaka yawu mutindu yina, kaka . . . ya kele kaka ya kusonama awa mpe—mpe beno lenda lakisa musapi ya beno na yawu. Ya kele—ya kele. . . ya kele mutindu beno ke nunga Satana. Satana tubaka na Yesu, “Kana Nge kele Mwana ya Nzambi, bika mu mona Nge kusala kimangu. Ba ke tubaka ti Nge kele ‘muntu ya bimangu.’ Balula matadi yayi na dimpa, mpe beto mona. Nge kele na nsatu.”

⁷ Yandi tubaka, “Kasi ya kele ya kusonama, Muntu ke zinga kaka na dimpa ve.” Beno me mona? Yandi bakaka Ndinga ya Tata

mpe nungaka dyabulu, kaka na kisika ya yandi mosi. Na yawu beno lenda sala kima mosi, kununga dyabulu na kisika ya yandi, na Ndinga ya Mfumu.

⁸ Na yina, mu ke vutula matondo ntangu nyonso na Mpangi Sullivan. Yayi kele. . . Beno lemvokila nzonzolo yayi: Mu banza ti ntangu ba salaka Mpangi Sullivan mpe Yandi bebisaka kaka moule. Ata mosi kele mutindu yandi. Ya kele kaka na muntu mosi yina mu me kutanaka ntete na luzingu ya munu yina ke bambukisaka munu moyo na Mpangi Sullivan, ya vwandaka E. Howard Cadle. Mu zaba ve kana yandi zabaka yandi to ve, ya—ya. . . Mpangi Cadle vwandaka kaka kiboba mosi ya bakala ya mbote ya bwala mutindu Mpangi Sullivan. Mpe yandi vwanda kotisaka maboko ya yandi na baposi ya yandi tii ba-bretelle ya yandi ke kwenda na yisi, mpe yandi vwanda zonzaka na yintu ya yandi na lweka, mpe yandi vwandaka E. Howard Cadle kaka mosi. Mpe na yawu mu kele—mu kele na kyese mingi na kuvwanda na Mpangi Sullivan mutindu nkundi mpe mpangi ya bakala na Nsangu ya mbote. Mpe mu ke sambila ti Nzambi ke sakumuna yandi mpe mwa dibuundu ya yandi awa, kento ya yandi ya ntalu, baya ya yandi ya luzolo.

⁹ Mpe samu na beno, milongi yankaka yina kele awa, samu na beno mpe dibuundu ya beno, milongi ya Nsangu ya mbote ya Muvimba ya Nsangu ya mbote, na zulu ya mwa bima ya fyoti ya Masonuku beto lendaka wisana ve mosi na yankaka na dibanza mosi. Mu ke wisanaka ve na kento ya munu na zulu ya mwa bima. Mpe beno zaba yina ya kele? Yandi ke zolaka tarte ya pomme mpe mu ke zolaka tarte ya cerise, na yawu beto ke wisanaka ve. Mpe mu ke tuba na beno yina mu ke salaka na ya munu: mu ke zolaka kitini ya tarte ya cerise ya mbote ya tiya (mu lenda ndima yawu ntangu yayi) mpe mu ke tula manteka na zulu ya yawu, mpe na manima kutula melasse na zulu ya yawu; mpe, mpangi, beno ke kuzwa kima ya mbote na kudya! Kento ya munu kele na boma ya yawu. Mu banza ti yandi kele na boma ya ba-calorie. Yandi lendaka zola yawu, kasi beno zaba mutindu bakento kele, bawu kele na boma. . . Bawu ke kumaka mingi fyoti ti beno lenda tsokota bawu na ntunga mpe kuzenga bawu na mukwa, mpe dyaka bawu zola—bawu zola kukuma fyoti. Yina kele nkadulu ya bawu, mu banza, na yawu ya kele. . . Mpe, kasi mu ke zola yawu. Ntangu yayi, beto ke wisanaka ve na yina, na bima yankaka beto kele mbote mingi. Kasi, beno me mona, beto kele ve ya muvimba ya kuwisana. Na yawu beto ke mona kima mosi, bampangi, kasi kima ya mfunu, beto ke na kudya tarte, yina kele kima ya mfunu.

¹⁰ Mingi-mingi, samu na mbotika ya Mpeve-Santu, mpe nkwezulu ya Klisto, mpe malongi ya nene ya evanzeliste, ya misiku ya Biblia, kieleka beto ke telamaka diboko-na-diboko na yawu. Mutindu mosi ya bampangi ya kuvukana ya nene, kukondwa kibaka ya denomination, kukondwa kima kusala beto

dibaku, beto ke kwenda na Calvaire mutindu basoda mosi ya nene, kintwadi.

¹¹ Kana mu lenda vwanda mbala mosi lusalusu samu na beno, mu ke sepela na kusala yawu. Mpe mu ke kwikila ti beno ke tuba kima mutindu mosi samu na munu. Mpe beno lenda vwanda lusalusu samu na munu. Mpe ya kele kima mosi beno lenda sala, yina mu zaba, ya kele kusambila samu na munu, ti Nzambi kubika munu ata mbala mosi ve na kifu. Mu—mu—mu . . . Ya kele ve na kati ya ntima ya munu na kwenda nzila ya yimbi, mu—mu zola kukwenda nzila ya mbote, mu zola kusala yina kele mbote. Samu ti mu me bakula, mutindu Mpangi Jack Moore tubaka na munu kilumbu mosi, yandi tubaka, “Mpangi Branham, mu zola ve kutelama na kisika ya nge na kimbangi nyonso ya nge, na Kilumbu ya Lufundusu, samu ti Nzambi ke lomba nge mvutu ya nene,” yandi tubaka, “samu ti Yandi me pesa nge mafuku ya bantu na maboko ya nge.”

¹² Ntangu yayi, kana mu zaba ti mu ke telama kuna mpe mu ke pesa mvutu samu na bantu yina, na yina wapi mutindu ya Nsangu ya mbote mu fwana longa? Na wapi mutindu ya bukieleka, na yina mu ke simba na maboko ya munu bayina ba vulusaka na Menga ya Yandi? Mpe na yina Yandi pesaka munu dikabu . . . kukondwa ntembe, muntu nyonso ya ndwenga ke zaba ti yawu fwana katuka na Nzambi. Mpe na yawu, kana mu nata muntu na nzila mosi ya yimbi kaka samu ti kimvuka mosi tubaka yawu, Nzambi ke sala ti mu futa samu na yawu na Kilumbu ya Lufundusu.

¹³ Kasi ntangu mu monaka vision, awa ntama mingi ve, mpe kuwaka bantu yango kuboka . . . Beno kuzwaka mwa buku ya beno mazono na nkokila? *Ndinga* ya Bantu ya Mumbungo. Yina kele mbote. Mpe na vision yina . . . Na ntangu mosi beto ke nyetika yawu na bima nyonso ya fyoti; ya kele ve nyonso ya yawu. Kasi na kati ya yawu, mpe na kumonaka yawu, mpe mu telemaka kaka kuna mutindu—kaka mutindu mu me telema kaka ntangu yayi. Mpe mu vwandaka tala munu mosi ya kulala kuna na zulu ya mbeto, mu vwandaka tala kento ya munu, mpe dyaka vwandaka ya kutelama awa vwandaka tala munu mosi. Mpe awa vwandaka ya kutelama bantu yina na nziunga mutindu yayi ntangu mu tubaka, “Ba ke fundisa Paul samu na Nsangu ya mbote yina yandi longaka?”

¹⁴ Yandi tubaka, “Yinga.”

¹⁵ Mu tubaka, “Mu me longa Ndinga nyonso kieleka kaka mutindu yandi salaka.”

¹⁶ Mpe bantu mafuku kubokaka, “Beto ke na kupema na zulu ya Yawu!”

¹⁷ Ya kele mutindu yina mu zola ti yawu vwanda ntangu mu ke sabuka kuna, beno me mona. Mu zola ti ya vwanda mutindu yina, kaka mutindu yina, kaka yina Paul tubaka. Mu

zola ve kubwela kima mosi na Yawu, kukatula kima mosi na Yawu. Kaka yina Biblia ke tuba, ya kele kaka mutindu yina mu zola kubumba yawu, beno me mona. Mpe ya kieleka, beno bumba yawu mutindu yina, ba-denomination na lweka nyonso ke telemisa dibaku na kutelemina Yawu.

¹⁸ Mpe na yina, bambala mingi, bampangi ke banzaka ti mu ke telemina bampangi ya munu. Nzambi zaba luswaswanu na yawu, kaka mutindu mosi Yandi zaba yina kele kieleka. Beno me mona? Ya kele ve samu na kutelemina bampangi, ya kele sysiteme yina ke sala beto kuvwanda ve bampangi. Ya kele ve Ndinga ya Nzambi ke kanga beto na kuvwanda bampangi, ya kele sysiteme yina beto ke kota yina ke kanga beto na kuvwanda bampangi. Ya kele kieleka. Na yawu, wapi kisika beto fwana telema? Beno telema na Ndinga, mpe Nzambi ke sala ti bantu nyonso kukuma na Yawu (ya kele kieleka) na—na zulu ya yawu. Beno bongisa yawu ata mbala mosi ve, na mutindu ya denomination, beno bika kaka yawu na mutindu ya Nzambi, mpe beno landila kaka na kukwenda; beno tala kaka na nsuka, beno kangama ngwi, Nzambi ke nata yina me bikana ya yawu.

¹⁹ Ya me vwanda na bima mingi beno me sala samu na munu, yina mu ke sepela na yawu. Ntangu yayi kana mu lenda sadisa beno, mu ke pesa beno kitende ya kisambu to kima mosi. Ntangu yayi, beno yufula munu ve yina me tadila malongi, samu ti mu—mu zola ve kusala yawu. Na yawu bantu mingi ke sonikilaka munu bakyuvu na yina me tadila makwela mpe kufwa makwela mpe nyonso yina, ya kele dyambu ya mpasi na dibuundu. Mu ke vutulaka bawu ntangu nyonso, mpe ke tubaka, “Beno yufula pasteur ya beno.”

²⁰ Bantu ke sonikaka mikanda awa mpe ke tubaka, “Wapi mutindu samu na *yayi*? Mpe wapi mutindu samu na *yina*?” Mu ke vutula mukanda, beno ke kuzwa yawu. Beno mona pasteur ya beno na bima fyoti samu ti, na manima ya nyonso, yandi kele mvungi ya beno. Yandi—yandi kele—yandi kele yandi yina Nzambi fidisaka na kukeba na zulu ya beno. Mpe beto lendaka wisana ve na zulu ya yawu, mpe kuna yina ke sala muvusu na kati ya dibuundu ya beno. Beto zola yawu ve. Ve! Ve! Beto zola kaka ti beno bika kusala bima yina kele disumu, bima yina kele na ngaanda ya Biblia, mpe kulandila kaka na kukwenda na ntwala na Nzambi. Beno me mona? Mpe kana beno nata mwa bamvita mpe bima ya mutindu yina, yina ke nyongisa dibuundu. Na yawu, mu ke zola mingi ti pasteur ya beno kutuba na beno yina me tala makwela mpe kufwa makwela, mpe bima *yayi* mpe bima *yina*, ti yandi sala yawu. Yandi kele kisadi ya Nzambi mpe, mpe yandi kele na bima samu na kusala yawu.

²¹ Beno bambuka moyo na Muntu ya Samarie ya mbote yina talaka muntu ya kulwala yina? Yandi nataka yandi na hotel (ya kele dibuundu) mpe pesaka muntu yina kuna bambongo zole ya kisengo, mpe yandi tubaka na yandi kana yandi ke vwanda na

nsatu ya mingi ti yandi ke futa yandi ntangu yandi ke kwiza. Na yawu, yandi kele na bambongo zole ya kisengo, yandi lenda keba beno kana ti yandi kele muntu ya Nzambi. Kana yandi kele muntu ya Nzambi yina ke telamaka na zulu ya Ndinga ya Nzambi, yandi—yandi kele na yina Nzambi pesaka yandi: Mpeve mpe Ndinga. Ya kele kieleka? Wapi mutindu beto fwana sambila? Na Mpeve *mpe* na Kieleka. Mpe Ndinga kele Kieleka. Ya kele kieleka?

²² Ntangu yayi, matondo na beno, dyaka. Mpe ntangu yayi, mu kele mingi ya kulemba, mpe kieleka ya kulemba na manima ya midi yayi, mu ke na kubanza dyaka ve kuvwanda na hotel yankaka ntangu nyonso mu ke zinga. Feti ya malafu ya nene, mpe mpimpa nyonso, ke bula myelo mpe ke boka, mpe bakento. . . Oh! Mu vwandaka kaka ya kuvumbuka, mpimpa nyonso. Beno tala nyonso. Mpe na yawu mu—mu banza ve kuvwanda na hotel yankaka. Mu ke kwenda na motel. Mu ke kuzwa samu na munu kaminyo samu ti mu lala na kati ya yawu, kisika mosi na ngaanda ya lupangu. Mu ke kwenda kuzwa yawu, kuzwa samu na munu mosi tenta mpe saki ya mbeto, to kisika mosi kisika mu lenda kuzwa samu na munu mosi, kisika mosi. Ya kele kieleka.

²³ Ya kele mingi ya kifuluka na disumu, yinsi yayi, kukondwa ntembe! Ya kele ya kuyala, mpe ya kupola tii na mukwa. Kaka awa na kisika yankaka, na kizunga ya beno. . . Ve kaka kizunga yayi, bisika nyonso. Kaka awa, bamvula fyoti me luta, mu vwandaka na—na lukutakanu ya nsambulu awa na kizunga yayi, na mbanza mosi ya nene. Mpe mpimpa yina nkonga ya misambidi, ya dibuundu ya orthodoxe na bantwenya, vwandaka na lukutakanu. Mu—mu ata mbala mosi ve. . . Mu vwandaka na Afrique mu talaka kusala ya vaudou mpe nyonso, mu me kuwaka ntete ve kima ya mutindu yina. Mpe na suka yina landaka, (mu lenda tuba na beno ve kieleka, beto kele dibuundu ya bantu mingi). . . ya kulala na ntoto, bima ya busafu kusalamaka, bambwata ya whisky bisika nyonso. Mpe bana yango ya fyoti, bana ya babakala mpe bana ya bakento na kati ya kivinga mosi mpimpa nyonso, kintwadi. Mpe na suka yina landaka, “tata ya santu” ya kuvwanda kuna, mpe bawu ke fukama na ntwala ya yandi mutindu *yina*. Na yisi ya Nkumbu ya Yesu Klisto!

²⁴ Mu me kuma kilawu? Wapi—wapi dyambu na munu? Mu lenda kaka ve kutelama na bima yina! Ya. . . kima pasulaka munu ntangu mu monaka yawu. Ya kele samu na kumonikisa Mfumu Yesu ya munu? Feti ya busafu, ya kifuluka na malafu na bima ya busafu yina. . . me sadila bantwenya yango ya babakala mpe bakento, ya kulala na ntoto mpe na bitunga ya mikanda, mpe bambwata mpe. . . Oh, oh, kyadi! Beno lenda bokila yawu Buklisto? Kuyituka ve yinza kele na kati ya kitezo ya disumu. Mbote, yinki musumuki ke tuba ntangu yandi ke tala yawu? Mafunda ya bawu.

25 Bantwenya ya bana ya bakento yina vwandaka mingi ya kulawuka malafu ti na mpasi bawu zolaka telama, mpe na kivinga mpimpa nyonso na bana ya babakala, mpe vwandaka zonza mambu ya yimbi ya mvindu yina beno me kuwaka ntete ve na luzingu ya beno. Mu vwandaka tula kuse na zulu ya yintu ya munu mutindu *yayi*, samu na kumeka na kulala. Kuna na bakulwale, ya kulawuka malafu, mpe vwandaka mata mpe kukulumuka na yisi mutindu yina, misambidi!

26 Ntangu yayi, mu lenda vingila yawu na bantu ya masumu, awa, bayina ke bokilaka bawu mosi bantu ya bansaka, awa na nsaka ya bowling. Kana mosi ya bana ya munu ke banda na kwenda na bayinzo ya bansaka ya bowling, mu ke basisa yandi na yinsi. Uh-huh. Ba ke bokila yawu nsaka, ya kele nsaka ve. Yinki yayi kele . . . Kana nge zola kuvwanda ya kusungama, beno sungama na Nzambi. Kieleka.

27 Mu zola kutanga samu na beno, kaka mwa bampova ya Biblia. Beno ke tala mwa bampova yayi yina mu zola kutanga awa mutindu bisono, ya kele na kapu ya 17 na Ntete ya Rois, na nzila ya 1te.

. . . Mutindu MFUMU Nzambi ya Israel kele moyo, na ntawala ya yina mu ke telama, ya ke vwanda na ata kinoko to mvula na bamvula yayi, . . . landila ndinga ya munu.

Ntete ya Rois, 1te ya ka- . . . kapu ya 17, na nzila ya 1.

28 Kana mu lenda fidisa beno kitende ya kisambu, na ntangu nyonso, beno sonikila kaka munu; sekletele ya munu awa, yina kele awa ntangu yayi, Mpangi Maguire. Bantu yikwa me kuzwaka ntete kitende ya kisambu me katuka na beto? Ti beto tala diboko ya beno. Beno telema, Mpangi Jim. Mu zola kumona . . . nge, mpe kento na nge mpe. Beno tala secrétaire ya munu mpe kento ya yandi, bayina ke salaka bisalu, bayina ke fidisaka . . . Beno tala mwana ya bakala mpe mwana ya kento yina ke fidisaka beno bilele ya kisambu na lukutakanu, bawu zole Miklisto ya kukipesa. Mpe ndinga, mwa ndinga ya mbote yina beno ke kuwaka na alo-alo ntangu beno ke bokilaka munu, ya kele mama ya ntwenya yayi ya kuvwanda kuna, kento ya yandi. Tata mpe mama ya yandi, mpe bayankaka, kele awa na beto bubu yayi; mpe—mpe baya ya zola, kele bisika nyonso. Na yawu . . . Mpe dyaka beno zaba secrétaire ya munu na bilanga ya kulonga, Tata Mercier, Mpangi Leo Mercier, yandi kele awa kisika mosi, mpe Mpangi Gene Goad. Mpe na yawu kana beto lenda fidisa beno kitende ya kisambu, na ntangu nyonso, nyonso yina beto lenda sala, kusambila samu na beno na alo-alo; nyonso yina beto lenda sala, beto ke sala yawu.

29 Muntu ya ngitukulu yayi na mukawa na diboko ya yandi, na kutambula ya yandi ya ngolo, meso ya yandi vwandaka ngenga na Nkembo ya Nzambi, mandefo ya yandi vwandaka ningana na

mupepe, yandi vwandaka ya kufuka kitini ya ntama ya mpusu ya dimeme ya mika ya yinda, yandi vwandaka tula dikulu ya yandi kaka na ngolo nyonso na yina yandi vwandaka tambula nzila ya Samarie. Yandi vwandaka ve na mingi ya kutala, kasi yandi vwandaka na MUTINDU ME TUBA MFUMU samu na yinsi yina ya nene ya Israel. Yinga, Elie ya Thischbite, profete ya Mfumu. Yandi vwandaka ve na mingi ya kutala, kasi yandi vwandaka na Ndinga ya Mfumu.

³⁰ Yandi vwandaka ve na boma ya kutelama na ntwala ya ntinu, samu ti yandi vwandaka na Mvwandulu ya kulutila nene na ntinu, yandi vwandaka na Mvwandulu ya Yehowa. Na yawu, yandi zabaka kisika yandi vwandaka ya kutelema. Mpe ntangu yandi kwendaka na ntwala ya ntinu yandi babaka ve mpe tekataka ve, yandi zabaka yina yandi vwandaka zonza. Yandi lendaka kutuba na ntinu, “MUTINDU ME TUBA MFUMU NZAMBI YA ISRAEL, ‘Ya ke vwanda na ata mvula to ata kinoko tii mu ke bokila yawu.’” Samu na yinki yandi tubaka mutindu yina, “Tii mu ke bokila yawu. Landila ndinga ya *munu*”? Samu ti yandi vwandaka na Ndinga ya Mfumu, yandi vwandaka profete, mpe profete kele na Ndinga ya Mfumu.

³¹ Ya kele kima ke bula na kumona kifwani na kati-kati ya Israel ya Ngwisani ya Ntama mpe Amerique bubu yayi. Bawu zole vwandaka bayinsi ya nene. Bawu zole ba tungaka yawu, mpe bantu ya bawu kwizaka kuna, samu na bankwamusu ya nsambulu.

³² Ba talisaka Israel mpasi na Pharaon mpe vwandaka na kimpika bankama ya bamvula, kisika ba niminaka bawu na kusambila Nzambi ya kieleka mpe ya moyo, mpe ba niminaka bawu bweso yina; mpe bawu kumaka bampika. Kasi Nzambi salaka bawu nsilulu na kati ya Biblia ya Yandi, to na Ndinga ya Yandi, mpe na nzila ya bapofete ya Yandi, ti Yandi ke pesa bawu yinsi. Mpe ti bawu ke kota na yinsi yayi mpe ke basisa na ngaanda bantu yina kele na yinsi yina, mpe bawu bakaka difwa ya bawu, samu ti Nzambi vwandaka sala yawu na lukanu mosi.

³³ Mpe mutindu mosi kele yinsi ya beto yayi ya nene. Beto kwizaka awa, mpe na Ditadi ya Plymouth ba tungaka yinsi yayi na kimpwanza ya nsambulu samu ti bankooko ya beto kukimaka nkwanusu ya Rome ya sysiteme ya Jezabel ya bubu yayi, mpe bawu kwizaka awa mpe bawu kuzwaka bankwamusu mingi ya nene mpe ba-martyr na yisi ya systeme yina ya Jezabel. Mpe landila Biblia, na Apocalypse, kapu 13, Nzambi silaka bawu kisika ya kupema, mpe kisika, samu ti kento kunatamaka na ntoto ya kuyuma kisika ba dikisaka yandi samu na ntangu mosi, ya ntangu, mpe ndambu ya ntangu. Nzambi salaka nsilulu na Amerique, to na dibuundu (na kento), na kukota na yinsi yayi.

³⁴ Beno me tala Apocalypse 13? Bibulu nyonso yankaka kubasikaka na mubu, na bamaza; Apocalypse 17:17, ke tuba,

“Maza yina nge me mona kele bantu ya kufuluka mpe bantu mingi.” Bibulu nyonso yankaka, bawu basikaka na maza, bantu ya kufuluka mpe bantu mingi. Kasi ntangu Etats-Unis kwizaka, “Yandi basikaka na ntoto kisika bantu vwandaka ve.” Mpe beno bambuka moyo, ntangu yandi mataka, yandi talanaka mutindu mwa mwana-dimeme.

³⁵ Ntangu yayi, mwana-dimeme kele na mampoka zole, mpe ya kele ngolo ya bantu mpe ngolo ya dibuundu. Kasi ntangu bawu vukanaka, beno bambuka moyo, kuna mwana-dimeme yina vwandaka zonza mutindu vwandaka sala ntete dalango; mpe dalango vwandaka Rome.

³⁶ Ntangu dalango kutelamaka na ntwala ya kento samu na kufwa mwana ya yandi ntangu kaka yandi zolaka butuka, dalango ya mbwaki. . . Yandi telamaka na ntwala ya kento Israél, samu na kufwa Mwana ntangu kaka Yandi zolaka butuka, mpe fidisaka nkwanusu mpe kufwaka bana nyonso ya bamvula zole tii na yisi? “Rome, dalango, kutelamaka na ntwala ya kento samu na kufwa mwana ya yandi ntangu kaka yandi zolaka butuka.”

³⁷ Mpe na yina, beto talaka, ti yinsi yayi kutungamaka mutindu yinsi ya kimpwanza, mpe vwandaka. . . vwandaka na mwana-dimeme, yina zola kutuba Mwana-dimeme ya Nzambi. Kasi, na manima ya mwa ntangu fyoti, sysiteme yayi mosi yina kele na beto, vwandaka zonza mutindu dalango mpe vwandaka sala ngolo nyonso vwandaka na dalango na ntwala ya yandi.

³⁸ Bawu ke fwananaka, mosi na mosi, na mutindu ya kulunga. Mpe beno bambuka moyo ntangu bayayi. . . Israel kwendaka kuna mpe bakaka yinsi ya yandi na Palestine, basisaka na ngaanda bantu nyonso yina vwandaka vwanda na yinsi yina mpe bakaka yinsi. Beto kwizaka mpe beto bakaka yawu na bakindien, basisaka bawu mpe bakaka yinsi. Nzambi vwandaka na kikuma samu na yawu. Nzambi zolaka lakisa yinza yina Yandi lendaka sala na mwa nkonga ya bantu yina vwandaka sossa kimpwanza, mpe kimpwanza ya nsambulu, samu na kusadila Nzambi.

³⁹ Yinki bawu salaka samu na Israel? Yandi salaka Israel yinsi ya kulutula nene na yinza, mpe yandi vwandaka mutindu yina tii yandi basikaka na luzolo ya Nzambi. Yinki Yandi salaka na Amerique? Yandi salaka yandi yinsi ya kulutula nene na yinza tii yandi ke na kubasikaka na luzolo ya Nzambi. Ya ke fwanaka, mosi na yankaka, ya kieleka.

⁴⁰ Ntangu Israel kwizaka na yinsi, bawu vwandaka bantu ya nene samu ti bawu vwandaka na bantwadisi ya nene. Bawu vwandaka na bantu yina ke zitisa Nzambi, mutindu David, Ntinu Salomon. Yinza nyonso vwandaka zitisa bawu, mpe bawu sepelaka na bweso yina ya ata mvita, ata mpasi, mpe kuzinga na yisi ya ngolo ya Nzambi, tii ntangu bantu nyonso ya kuzabana na yinza kukwizaka mona bawu. Nzambi pesaka bawu dikabu ya

kumona mabanza, ya vwandaka na zulu ya Salomon. Mpe ntinu ya kento ya Sude, na . . .ntinu ya kento ya Seba kwizaka nzila nyonso sabukaka Ntoto ya kuyuma ya Sahara (ya bakaka yandi bangonda tatu) kaka na kuwa ndwenga ya Salomon. Mpe ntangu yandi monaka ti Salomon lendaka mona bampeve, mpe ti yandi monikisaka yandi mansweki ya yandi ya ntima ya yandi, yandi tubaka, “Nyonso yina mu kuwaka na zulu ya nge vwandaka kieleka, mpe ya kulutila dyaka.” Yandi ndimaka ti ya vwandaka Nzambi.

⁴¹ Mpe Amerique, na zulu ya lufulu ya bankooko ya beto bayina kwizaka awa samu na nsambulu ya kimpwanza . . .Beto vwandaka na bantu ya busantu na bilumbu yina, mutindu bantwadisi: George Washington, Abraham Lincoln, bantu ya Nzambi, ya bankadulu ya kuzabana. Amerique vwandaka Amerique, na bilumbu yina.

⁴² Georges Washington, awa na Valley Forge, ntete yandi sabuka Delaware, sambilaka mpimpa nyonso, na mutindu ti yandi kupolaka tii na mukaba ya yandi, yandi kufukamaka na mvula ya mpembe. Mpe na suka yina landaka ntangu ba-Américain bandaka na kusabuka, ya vwandaka kaka na kutala makumi zole na zulu ya nkama ya bawu yina vwandaka na mapapa ya kulwata, Basoda ya Amerique. Kasi bawu vwandaka na musiku mosi, bawu vwandaka na kima bawu vwandaka nwanila. Bawu vwandaka kipe ve yina zolaka kwiza to kusalama. Muntu ya bilanga vwandaka kwiza, vwandaka sutope kusaba bilanga ya yandi mpe vwandaka bika ngombe ya yandi, mpe vwanda baka munduki ya yandi mpe vwandaka kwenda nwana samu na yina yandi zabaka vwandaka kimpwanza. Mpe kilumbu yina landaka, mu banza ya vwandaka, mabulu ya masasi yiya to tanu, masasi ya munduki mousquet, tobulaka kazaka mpe yimpu ya yandi kasi kuzwaka yandi ve.

⁴³ Bantu ya Nzambi, bayina tungaka yinsi yayi, bantu ya nene! Ya ke yitukisa ve ti bawu sonikaka:

Ti yinsi ya beto kupela ntangu mingi
Na nsemo ya santu ya kimpwanza,
Keba beto na ngolo ya Nge,
Nzambi ya nene, Ntinu ya beto!

⁴⁴ Ntangu fyoti me luta, mu solulaka na kiboba mosi ya bakala na Corydon, na Indiana. Yandi tubaka na munu na yina ntangu capitle vwandaka na Corydon, mpe mutindu yandi . . .yandi tubaka mutindu yandi vwanda kwendaka na kipusu ya yandi ya ngombe na kwenda kuwa gouverneur kuzonza. Mpe yandi na gouverneur vwandaka bawu zole kaka, bayina vwanda lwataka kazaka na pantalo mutindu mosi, complet. Yandi tubaka ti yandi vwanda yindulaka mameme mpe vwanda zengaka mika ya bawu, mpe vwanda sukulaka mika ya bawu, bampangi ya yandi ya bakento kutungaka yawu mpe salaka yandi kazaka yina

ke kwenda na pantalo ya yandi. Mpe kiboba ya bakala yayi ya kuvwanda kuna, yandi zolaka vwanda na bamvula pene makumi nana na tanu to makumi yivwa, yandi vwandaka benda mandefo ya yandi mutindu *yina*, mpe yandi tubaka, “Billy, ya kele ntangu *Ameriki* vwandaka *Ameriki*.”

⁴⁵ Mu talaka bakala ya kiboba yayi, mpe mu banzaka, “Bakala, nge, mingi ya bantwenya yayi ke zola ve kukwikila yawu, kasi nge ke na kutuba kieleka.”

⁴⁶ Yinki salamaka na Israel na manima ya masolo nyonso yayi ya busantu? Bawu vwanda kipe dyaka ve. Bawwu bandaka na kukuma na kisika bawu, mbote, bawu vwandaka kipe dyaka ve yina vwandaka salama. Bawu bandaka na kulemba na kusambila Nzambi, ata ti bawu bumbaka mutindu ya nsambulu kaka mutindu beto kele na yawu. Bawu vwandaka na mutindu ya kinzambi. Kasi bawu bandaka na kubika kimpwanza na bantu ya bawu, mpe—mpe bawu bandaka na kukotisa bakyeta ya mutindu na mutindu na dibuundu ya bawu. Kisambu ya Baal bandaka na kukota na malembe, mpe Israel kukumaka ya kulawuka na byese, ya kulawuka malafu, mpe ya bima mutindu yina, mpe na nsuka kunataka ntwadisi yina zabaka ve Nzambi; Achab, yina landaka tata ya yandi. Mpe tata ya yandi vwandaka muntu ya kukondwa busantu, muntu ya bimvwama, kasi muntu ya kukondwa busantu. Mpe yandi salaka masumu nyonso, kulutila muntu nyonso na ntwala ya yandi kusalaka ntete. Kasi Israel, na nkadulu ya bawu ya buzoba ya kulawuka malafu, bawu tulaka yandi na kiti ya ntinu na kuvwanda ntwadisi na zulu ya bawu. Bawu banzaka ti yawu vwandaka mbote, kaka mutindu mingi ya bantu ya Amerique ke salaka bubu yayi, “Yandi kele muntu ya politiki ya mbote, na yawu wapi luswaswanu ya ke sala? Ya ke sala luswaswamunu mosi ve, samu ti yandi kele muntu ya politiki ya mbote.”

⁴⁷ Mingi ya bantu ya Amerique, mingi ya bawu, me tekisa bukuluntu ya bawu, mutindu muntu ya Amerika, mpe bawu ke tuba, “Wapi luswaswanu ya ke sala, kana kaka nge kuzwa mwa ba-dollar fyoti mingi na luyalu mpe kuzinga?” Bawu kutekamaka samu na kivumu, mpe samu na kulula mpe samu na nsatu ya masumu ya yinza, mpe zimbanaka kima ya kieleka yina beto kuminaka na Ditadi ya Plymouth. Bawu zimbanaka difwa ya beto, mpe me kwenda tekama na bankonga ya bilawu ya byese. Mutindu ya vwandaka na bilumbu ya Israel, mutindu mosi ya me vwanda, Amerique me baka nzila mosi yina, kaka nzila mosi, byese!

⁴⁸ Na manima ya ntangu fyoti, luyalu kundimaka disumu: “Na yina kaka nge ke kuzwa synagogue, wapi luswaswanu ya ke sala?” Ya kele kieleka yina Amerique salaka. Mpe beto bandaka na kubongisa beto mosi kintwadi mpe salaka bimvuka ya fyoti, mpe masumu mingi, masumu mingi, masumu mingi. Beto zolaka vwanda na misiku ya kieleka yina beto kuminaka awa! Disumu

kubandaka na kukota na malembe na mabuundu kaka mutindu ya salaka kuna. Bakento bandaka na kuzenga bansuki ya bawu, na kulwata bilele ya kukondwa buzitu, ke zenga yawu konso mvula mpe. . . Mpe babakala bandaka na kusala *yayi, yina, mpe yankaka yina*, mpe kubula bakalati mpe vwanda bula bansaka ya loto na kati ya dibuundu, mpe kaka mutindu yinza mutindu bawu vwandaka, ya kulawuka na byese, bantu ya buzoba ya kulawuka malafu.

⁴⁹ Milongi ke kuzwa ba-diplome ya seminere, mpe bishop ke tuba, “Beno longa, bana ya babakala, nyonso yina beno zola. Na mutindu mu ke tala, menga ya Yesu Klisto kuyumaka bamvula funda mosi na bankama yivwa me luta.” Tii dibuundu kumaka na kima ve kasi organisation, mutindu loge. Ti beno zimbana ata mbala mosi ve manima ya midi yayi! Me kuma mutindu loge, yinza bandaka na kukota na malembe, milongi bandaka kaka na kuvukisa mutindu bawu salaka na bilumbu ya Achab. Ya kufuluka na masumu, ya kubola tii na mukwa, mpe me landila mpe me landila na kukwenda na mutindu ya ngolo mutindu ya lendaka kukwenda.

⁵⁰ Ata ti Nzambi fidisaka bawu profete na manima ya profete, mpe Yandi bondilaka bantu na kupesaka kyadi, mpe bawu pesaka manima ya bawu na Yawu. Bawu vwandaka zola mutindu ya bawu, bawu vwandaka bantu ya Israel, bawu vwandaka na kimpwanza, bawu vwandaka yinsi ya nene, bankooko ya bawu salaka *yayi-mpe -yina* (David mpe Salomon), bawu zolaka sala yina bawu zolaka kusala. Kaka kima mosi yina beto tulaka na yisi ya beto, kieleka; yina Washington, bankooko ya beto, mpe na yina bawu kutelamaka. Kasi, mpangi, beto kele mafuku ya bakilometele ntama na bima yina; mabuundu ya beto kele, mafuku ya bakilometele ntama.

⁵¹ Ya ntama. . . Dibuundu ya ba-Methodiste bubu yayi, na yina dibuundu ya ba-Methodiste vwanda vwandaka! Yina ba-Pentecotiste kele bubu yayi, mpe yina ya vwanda vwandaka! Yina ba-Baptiste kele bubu yayi, na yina ya vwanda vwandaka! Kana beto vwandaka na ntangu ya kuvutuka mpe kuzonzila na John Smith mpe mingi ya mibongisi ya ntama. John Smith tubaka, ntete yandi kufwa, yandi tubaka, “Kima ya boma kele ti bakento ya ba-Methodiste ke na kubandaka na kulwata babaki ya wolo na misapi ya bawu.” Methodiste! Yinki yandi ke tuba bubu yayi na kumona bawu na bansuki ya bawu ya kuzenga, mpe kizizi nyonso ya bawu ya kupakula, ke lwata bakupe? Yawu kele samu na disumu!

⁵² Yinki Nzambi me sala na Amerika? Yandi me fidisa reveil na manima ya reveil, reveil na manima ya reveil. Milongi me longa Ndinga, me meka na kubokila bantu na kuvutuka na Nzambi. Mpe yinki bawu salaka? Kima mosi yina Israel salaka, bawu losaka Yawu! Bawu sekaka bawu! Bawu bokilaka bawu “ba-exalté”! Losaka bawu na boloko!

⁵³ Kana mosi ya bampangi ya munu ya bakento mpe mosi ya bampangi ya munu ya babakala, ya dibuundu yayi bubu yayi, zolaka telama na hotel yina mazono na mpimpa mpe ti telemisaka maboko ya bawu mpe sambilaka Nzambi mpe bokaka na kivinga yina, ba zolaka vwanda na boloko bubu yayi samu na yawu. Kasi nkonga ya bantu ya bizoba ya mpamba, ya kukola “ba-exalté ya kukondwa nsatu” lenda telama kuna mpe kuboka mpimpa nyonso; mpe ya kulawuka malafu, mpe kuvwenza mpe kukatula bilele ya bawu na bakento ya bawu mpe kulandila, mpe kubwa na ntoto mpe kuboka mpimpa ya muvimba, mpe dyaka bawu lenda tuba ve dyambu samu na yawu. Kukondwa ntembe ti beto kele ya kubedisa na yisi ya diboko ya Nzambi!

⁵⁴ Beno tala, mpe me landila mpe me landila, Nzambi fidisaka milongi, salaka bidimbu mpe mambu ya ngitukulu, na kumonisaka Ndinga ya Yandi. Mpe kima ya kulutila kele, mingi ya bisyelo ya bubu yayi me manga Yawu mpe me seka konso reveil. Mutindu Dibuundu ya Klisto mpe bayankaka, “Bilumbu ya bimangu me luta.” Na kumeka na kukanga yawu na mutindu ya bawu ya mbote na lutangu ya fyoti ya bantu ya Nzambi yina bikanaka. Mutindu ya vwandaka na Israel, mutindu mosi ya kele bubu yayi. Bambala mingi, Nzambi zolaka basisa bantu ya Yandi na ba-organisation mpe ba-denomination yango, kunata bawu na ntoto ya kuyuma bawu mosi, samu na kuzonzila bawu. Mpe Yandi ke kuzwa bayina ke bikana, beno nyonga ve samu na yawu. Yandi salaka kuna, Yandi ke sala bubu yayi. Bawu landilaka mpe landilaka na kukota na disumu, na kudyatamaka na bima yina. Samu na yinki? Lutwadusu ya bawu, ya kele na kima ve ke kanga yawu.

⁵⁵ Mbote, ya kieleka, mu zaba bayinsi mingi ti kana bawu simba bantu na bala-bala ya kulwata mutindu beto ke salaka awa na Amerika, ba ke tula bawu na boloko. Ntangu mu kwendaka na Saint Angelo, na Rome (ntangu yayi, beno banza na yawu, mutindu yisi ya kele), bawu vwandaka na kidimbu kuna, na maziama ya Saint Angelo, “Na bakento ya Amerika: ‘Beno lwata bilele mpe beno zitisa bantu ya kufwa.’”

⁵⁶ Kana ya kele na kima yina ke sala beno kubela, ya kele kumona nkonga ya bantu ya Amerique kukwiza kisika. Mu vwandaka ya kuvwanda, na Lausanne, beto vwandaka sepela na kudya steak mosi, kilumbu mosi, Mpangi Arganbright mpe munu. Kilumbu yina landaka, beto vutukaka samu ti ya vwandaka mbote na kudya. Mu lendaka kuzwa mwa maza kuna, bawu vwandaka pesa kima yankaka ve kana vinu. Mpe mu zola kuzwa maza, mu zolaka tambula na mbwata ya maza na yisi ya mapeka ya munu, ntangu nyonso, samu ti bawu zolaka pesa ve beno maza na mesa. Na yina mu kwendaka na kati kuna, mpe nyonso vwandaka mbote tii ntangu “Miss Amerique” kukotaka na yimbwa ya fyoti, ya mvindu, ya kifuluka na miyoyo; na

misanga mingi ya ba-cent kumi ya kulwata mutindu *yina*, mpe na dikaya na nsuka ya kima ya yinda mutindu *yayi*, yandi me vwanda kuna vwandaka sala minene; mpe me tula yimbwa yina na zulu ya mesa, kima ya mvindu, ya yimbi yina.

⁵⁷ Ya kele . . . yimbwa kele kima ya kulutila yimbi yina Nzambi ke zonzilaka. Mpe kikunku ya kumi ya bawu lenda kufutama ve na yinzo ya Nzambi. “Ya kele mutindu kento ya ndumba, kikunku ya kumi ya kento ya ndumba,” Biblia me tuba. Mpe, dyaka, beno bawu yayi. Bawu ke kwenda sala controle de naissance mpe ke futa funda ya ba-dollar, na kutala, samu na mwa yimbwa ya fyoti; mpe kutambula na yandi bisika mpe kupesa yandi luzolo ya mwana, samu yandi basika mpimpa ya muvimba, mpe ke sala controle de naissance.

⁵⁸ Yinki ke vingila kasi poto-poto! Beno lendaka kuwa dyaka ve ndinga ya munu, kasi mu zola beno kubambuka moyo na yayi: Beto me kuma na nsuka!

⁵⁹ Kuna, beto ke mona yina salamaka, yina kusalamaka. Na nsuka, ngunga *ya nene* kwizaka: ba soolaka Achab, mpe ntangu yandi salaka, yandi kwelaka Jezabel; kento yina ya kubola ya ntama yina twadisaka Israel ya muvimba na kusambila biteki. Mpe mutindu Israel salaka yawu kuna, mbote, yayi. . . Bawu zolaka vwanda na kitezo ya kuvutuka manima, samu na kubika kima ya mutindu yina kusalama na yinsi ya bawu. Ba me sala misiku na bantu samu na bantu, mpe beto me sala kima mosi!

⁶⁰ Ya vwandaka na ntangu yina Amerique zolaka ve . . . bawu zabaka ya kulutila mbote na kubika ndumba ya ntama yayi, kento ya ndumba ya ntama yayi yina kunwaka menga ya ba-martyr, yina kufwaka bawu, mpe kikuma bawu kwizaka bumbana awa, samu na kimpwanza, bawu zolaka ndima ve kima ya mutindu yina. Ya ke lakisa ti beto kele na kitezo ya kuvutuka manima, yinsi ya muvimba, samu na kusoola kima ya mutindu yina. Oh, ya kieleka, ntangu yayi beno . . . bayankaka ya beno ba-Démocrate ya kukangama ya mbote ke banza yayi, ti “Oh, mbote, yandi ke—yandi ke sala mfumu ya mbote ya politiki.” Ya lendaka wakana dibanza ya mbote, na dibanza ya nsuni. Kasi na Ndinga ya Nzambi mpe dibanza ya kimpeve, ya ke simba ve. Kieleka ya ke simba ve, samu na mwa ba-dollar fyoti mingi mpe kukatula ya mwa bampaku to ya kima mutindu yayi.

⁶¹ Mpe beto ke na kuzwa ntangu mosi ya mpasi, ba-missionaire ya beto na bilanga ya kulonga bubu yayi, samu ti ntangu yayi ba ke tala beto yinsi ya Katolika. Mbote, ya kieleka, Russie ke talana communiste samu ti bawu kele na ntwadisi ya communiste. Chine ya mbwaki ke talana communiste samu ti bawu kele na ntwadisi ya communiste. Beto ke talana muntu ya ya Katolika samu ti beto kele na ntwadisi ya Katolika.

⁶² Oh, ntangu Achab vwandaka na kiti ya kimfumu . . . Beno ke tuba, “*Yandi kele* na zulu ya kiti ya kimfumu.” Ya kele kieleka,

kasi Jezabel vwandaka mfumu na manima ya kiti ya kinfumu yina. Yandi vwandaka yandi yina vwandaka sala ntwadusulu. Beno tala mutindu yandi bakaka misiku ya kieleka ya yinsi mpe bebisaka yawu, mpe samu na mbote ya yandi mosi mpe samu na mbwimi, mpe salaka Achab kusala yawu samu ti yandi kukwelanaka na yandi. Mpe ya kele mutindu na mfumu ya beto bubu yayi. Mu ke tuba ve ti yandi kele ve muntu ya mbote, kasi beno tala yina kele na manima ya yandi: kento ya kindumba, kima ya kieleka yina beno kiminaka awa (samu na kuvwanda Amerique); misiku ya kieleka yina tungamaka Amerique. Beto, na nzila ya nsodolo ya beto mosi ya kimpwanza, beto me sola kima ya mutindu yina.

⁶³ Ntangu yayi beno me mona samu na yinki ndinga ya munu ke suka ntama mingi ve. Kasi muntu ke zaba! Inga! Samu na yinki? Apocalypse 2:20, yandi me bokila yandi mosi “profete ya kento.” Beno tala kaka kituma ya disumu yina ke salama ntangu yayi. Beno tala mbote mukwa ya ke kulumuka na mukwa. Beno tala mbote mambu ya malu-malu, beno tala mbote bima ya yimbi kusalama na mabuundu. “Mpe, na nsuka, ya ke vwanda na nkwasusu,” Biblia me tuba mutindu yina, **MUTINDU ME TUBA MFUMU!** Ya kieleka, ya ke vwanda.

⁶⁴ Na yina yinki ke salama? Kaka mutindu yawu salamaka kuna, mutindu mosi ya ke vwanda ntangu yayi. Yandi vwandaka ngolo na manima ya yawu, yandi vwandaka yina ke twadisa yawu. Beno tanga . . . mu banza ya kele sambwa- . . . pene ya kapu 17 to 18, kisika mosi kuna, beno ke tala yina Jezabel salaka: mutindu yandi bakaka Achab, mpe yandi lendaka ve kutuba kima na zulu ya yawu samu ti ya vwandaka kento ya yandi. Beno tala na yina ba tungaka yinsi na ntangu yina, muntu ya Israel na kento ya mumpani (na manima ya yandi) yina vwandaka musambidi ya Baal. Mpe yinki yandi salaka? Na nsuka yandi salaka nyonso na mutindu ya malu-malu, mpe na mutindu ya mbote, mpe bantu vwanda kuzwa yawu na pete-pete mingi, tii dibuundu ya muvimba kubwaka samu na yawu, milongi mpe nyonso. Elie tubaka ve, “Mfumu, mu me bikana kaka munu mosi”? Mpe mutindu ya vwandaka kuna, ya me fwanakana bubu yayi.

⁶⁵ Bawu nyonso vwandaka na boma ya kutuba kima. Ya kele ve kaka mutindu kima mosi bubu yayi? Bawu vwandaka na boma ya kutuba kima mosi. Na yawu beto ke tala, bawu vwandaka me vutuka kaka manima, vwandaka tambula kidi-kidi, ya kukola, vwandaka landila, na kati ya bulawu ya byese, mpe nyonso yankaka, kaka mutindu ya kele bubu yayi. Jezabel kuvukisaka Masonuku yina . . . Yina yandi salaka . . . to misiku yina, mutindu—mutindu Jezabel ke vukisa. Beno bambuka moyo, Jezabel, yandi kukibokila yandi mosi “profete ya kento,” na kuvuna bantu, mpe yandi tubaka ti yandi kele “ndinga ya

Nzambi kaka na zulu ya ntoto.” Yandi ke sala dibanza ya nsuni kukwikila yawu kieleka mutindu yinza.

⁶⁶ “Ya ke vwanda na bisambu ya kento, na Etats-Unis, mpe ya ke vwanda Marie.” Mu monaka yawu, makumi tatu... na mvula 1931. Bima sambwadi kusalamaka. Mu kele kaka na yawu awa na zulu ya mukanda, na munu, ya kusunama na mvula 1931. Mutindu mu tubaka ti “Mfumu ya luyalu yayi, Franklin D. Roosevelt, yandi ke nata yinza ya muvimba, kusadisa na kusala yawu, kufidisa yinza na mvita.” Yandi kwizaka ntete ve na mvita, na ntangu yina ya nkokoso ya kimvwama. Mu tubaka, “Kima yankaka, . . .” Mpe mama ya munu, Democate ya kukangama, talaka munu yimbi ntangu mu tubaka yawu. Mu tubaka, “Mu ke kipe ve kana yandi vwandaka Republicain to kana yandi vwandaka Socialiste to nyonso yina yandi kele, yayi kele MUTINDU ME TUBA MFUMU.” Mpe mu tubaka, “Na kusalaka yayi, bawu ke pesa muswa na bakento na kuvote. Mpe ntangu bawu salaka yawu, bawu salaka nsoni mosi ya kulutula nene yina me salamaka ntete ve na yinsi yayi.” Mpe mu tubaka, “Kilumbu ba ke futa samu na yawu.” Mpe bawu me sala yawu na nsodolo yayi ya nsuka. Ya kele yina soolaka yandi, bakento.

⁶⁷ Mpe beno bantu ya ntalu ya bantu-dombe, na Sud, wapi mutindu beno me vote! Beno ke tuba, “Nge kele ve na muswa ya kutuba yawu na chaire.” Oh, inga, mu kele na muswa, ya kele Ndinga ya Nzambi! Mpe ditona ya—ya Abraham Lincoln, yandi yina pesaka beno kimpwanza, kele ya kutanda kuna na musée yina na zulu ya robe ya kento yina, mpe beno ke teka bukuluntu ya beno. Nsoni na beno.

⁶⁸ Mpe beno bantu, samu na politiki, samu ti beno kele kaka Democate ya mbote, beno me vote kima ya mutindu yina, mpe kuteka bukuluntu ya beno ya bu-Americanisme mpe Buklisto, samu na kupesa yawu na kento ya ndumba yina kimisaka beto na yinsi yayi, ya kele yina me sala beto yina beto vwandaka. Beno me mona mutindu yandi me kota na malembe? Kieleka na malembe, tii ntangu yayi yandi kele na kiti ya kintinu. Kieleka! Na kiti ya kinfumu ya Yinzo ya Mpembe.

⁶⁹ Beno tala mbote! Yimeni. . . Beno monaka kilumbu yankaka yina na zulu ya balukolo Katolika mpe balukolo ya ba-Protestant? Kusadisa lukolo ya Katolika kasi ya ba-Protestant ve. Beno me mona? Oh, mpangi! Beno tala mbote kituma ya bima yina ke kwiza ntangu yayi. Beno tala, mpe na yina bawu salaka yawu, beno tala yina kusalamaka. Disumu nyonso yayi yina ke bwelama. Bawu me kuma kuna mpe me nata yinsi na mutindu ya kisika ya kulemba.

⁷⁰ Mwa bamvula fyoti me luta, ntangu bawu vwandaka. . . bantu ya Pentecote kubandaka ntete, ya vuukisaka yinsi bamvula fyoti me luta ntangu Al Smith zolaka vwanda kandida. Amerika zabaka mbote na ntangu yina. Kasi Pentecote me kuma

mingi na mutindu ya yinza ti bawu me natama na kati mpe me teka miswa ya bawu mutindu Muklisto, na bapolitiki, mpe ya kele politiki na ntwala ya Biblia. Oh, la la!

⁷¹ Ngtangu yayi, kaka minuti, mpe beno tala kaka mbote mutindu yayi ke kuma. Ntangu yayi, beto me tala yina bawu salaka mpe bima yina bawu salaka, beto ke tala kaka yawu kufwanaka na mutindu ya kieleka, disumu bisika nyonso. Jezabel me kwiza, yandi me loka bantu nyonso. Mpe beno tala, na nsuka, yandi bandaka na kutunga batempelo ya nene samu na Baal. Ya kele kieleka? Mpe banganga-Nzambi ya Baal vwandaka kwiza mingi na kukatukaka bisika nyonso samu na kwiza na kisika yina, mpe bandaka na kupolisa yinsi na kisambu ya Baal.

⁷² Beno tala mutindu bawu salaka, beno tala mutindu bawu me kota na malembe. Kaka bima bawu salaka, beno tala kisika bawu kele bubu yayi. Beno tala Katolisisme kukota, kukota, kukota; bawu ke kota na kukwela, ke zenga yayi, kaka kieleka yina Daniel tubaka ti bawu ke sala. Kisengo mpe ntoto ke vukana ve, kasi ke vukisa bambuma ya bawu na mosi na yankaka, bawu ke zenga. Konso mwana ya kento ya Protestant yina ke kwelana na mwana ya bakala ya Katolika fwana kulisa bana ya yandi na Bukatolika. Nyonso mutindu yina, kukwelana, kuvukisa, mutindu yina tii ntangu ya me kuma na kisika tii ba me kota na Etats-Unis nyonso.

⁷³ Yinki beto ke sala mutindu ba-missionaire, kukwenda kuna samu na kukuula na Amerika ya Sude mpe kisika nyonso na yinza, Tommy Osborn mpe bayankaka, na kumeka na kuzwa bantu na ngaanda ya bumpani yina mpe bawu lenda ve kulakisa musapi ya bawu ti beto soolaka ntwadisi ya beto, mpe kima mutindu mosi. O Nzambi. Yinki ke—yinki ke salama na yinza yayi? Ya ke ningisa muntu nyonso awa. Wapi mutindu beto ke pesa mvutu? Yinki ba-missionaire ke tuba ntangu bawu ke tuba, “Beno me kwiza awa samu na kukuula beto na yayi, mpe bantu ya beno mosi tulaka kima mosi na kimalu ya beno kuna, na kiti ya kimfumu?” Wapi mutindu beto ke . . . Yinki . . .

⁷⁴ Beno tala na manima ya ba-page ya disolo, beno baluka na manima mpe beno mona yawu—kana ya kele kieleka, na kutala, ya kukondwa misiku yawu kele. Bawu zolaka sala yawu ve na bamvula me luta kasi, beno me mona, beto me tekisa miswa ya beto ya Muklisto na bapolitiki, mpe ya kele mutindu dyabulu yandi mosi ke kota. Achab vwandaka kima ve kasi kimonikisi ya Jezabel. Ya kele nyonso yayi ke vwanda, kaka kimonikisi. Yandi lenda ve kusala yawu yandi mosi, kasi sysiteme yina na manima ya yandi ke nata yandi na kusala yawu. Ya kieleka kaka! Beno bweta konsiansi ya beno, beno Miklisto. Beno vumbuka, ngunga me kuma ntama na yina beno ke banza. Kitezo na yina beto kele, kitezo na yina bawu vwandaka, mpe mutindu bawu vutukaka manima.

⁷⁵ Mutindu ntima ya nene ya luzolo ya Nzambi zolaka looka, mpe kudila, na yina Yandi monaka ba-missionaire ya Yandi. Salaka bawu kifwanukusu, bayinsi nyonso vwandaka kwiza bisika nyonso samu ti Nzambi sakumunaka bawu, na kumonaka bawu na kuvukana, na mutindu ya kimpeve, na kusadilaka Nzambi. Mpe kuna kubanza ti Yandi—Yandi zolaka mona bawu kuvutuka na zola ya bawu ya ntete mpe kusala yina vwandaka kieleka, kasi na mutindu ya kulandila bawu vwandaka kwenda ntama, mpe ntama, mpe ntanma, tii na nsuka Jezabel kukwizaka. Ya kele kieleka yina beto salaka. Kubalukaka na misiku ya Klisto. Ntangu Nzambi fidisaka milongi ya Yandi na yinsi nyonso, bawu longaka busantu (ba-Pelerin ya Sainteté, ba-Nazaréen, ba-Pentecotiste), “Beno vutuka na Nzambi! Beno vutuka na Nzambi!”

⁷⁶ Mpe mabuundu ya kieleka yina ba salaka na ntangu ya ntama kusekaka mpe kumokeke kaka. Mingi ya bawu mikwikidi ya malu-malu, mbote, bawu vwandaka fundisa nyonso yina bantu yayi vwandaka sala mpe vwandaka tuba “Ya vwandaka ya dyabulu.” Yinki ya salaka? Mpe dibuundu bandaka na kuwa yawu, bantu mingi bandaka na kuwa. Kima ya ntete beno zaba, “Kana kento ya Katolika lenda lwata mitindu ya bima yayi, ba-Protestant lenda mpe. Kana dibuundu ya Katolika lenda sala *yayi*, ba-Protestant lenda mpe. Na yina kana ba-Methodiste lenda, wapi mutindu samu na ba-Baptiste? Na yina kana ba-Baptiste lenda, wapi mutindu samu na ba-Pentecotiste?”

⁷⁷ Beno me mona, ya kele basysiteme yina bantu me salama samu na kukotisa bantu. Alleluia! Ya kele kieleka. Ya kele samu na yina mu ke teleminaka yawu, samu ti Ndinga ya Nzambi ke telemina yawu. Basysiteme bantu me salama: Nzambi ke teleminaka yawu, Ndinga ya Yandi ke telemina yawu, baprofete ya Yandi ke telemina yawu, Bisadi ya yandi ya kieleka ke telemina yawu, bayina nyonso me butuka na Mpeve ya Nzambi ke telemina yawu.

⁷⁸ Beno tala mutindu Israel kumaka, mutindu bawu vwandaka landa courant, tii na nsuka Jezabel kwizaka. Beno tala mutindu Amerika me kuma, mpe ke landa courant ya yinza, tii na nsuka Jezabel me baka kiti ya kintinu. Ya kele kieleka. Ntangu yayi, Jezabel vwandaka ve na kiti ya kimfumu ya Egypte . . . to, kiti ya kimfumu ya Israel, kasi yandi vwandaka mfumu ya kieleka na manima ya kiti ya kimfumu. Mpe bukimfumu ya Katolika kele ve na kiti ya kimfumu ya Etats-Unis, kasi yandi kele sysiteme na manima ya yawu samu ti yandi me kwelanaka na yandi. Mpe Biblia ke tuba, na yinsi yayi, bawu ke sala “kizizi ya *kufwanakana* na kibulu.”

⁷⁹ Oh, mpangi ya bakala, mpangi ya kento, yinki kele dyambu? Mbote, mu—mu zaba yina ya kele. Biblia ke tuba ti bawu ke kuma na nsungi ya Laodicée yayi, mpe ya kele kisika beto kele. Beno lendaka yina munu ntangu yayi, kasi kilumbu beno ke

lenda ve ntangu beno ke tala yina kele Kieleka. Beno lendaka ndima ve mpe kutelama mpe kubasika na yinzo na kubulaka dikulu, ya ke lakisa kaka kukondwa kutanga ya beno. Kasi kilumbu beno ke bakula, kilumbu beno ke sosa mpe ke zaba ti ya kele kieleka! Mu ke zonga Yawu na Nkumbu ya Mfumu! Mu ke talana mutindu cible, yina na nsuka ke nata munu na ntoni. Mu ke vwanda mbingi tii mu ke kufwa, kana Nzambi kusadisa munu. Ya kele kieleka.

⁸⁰ Awa beto kele na kitezo yayi beto kele bubu yayi, nyonso ya yawu ke na kulandila mutindu yina. Na Israel, mutindu Achab salaka, kimonikisi ya Jezabel samu ti yandi vwa- . . . yandi vwandaka ya kukwelana na yandi. Amerika, ntwadisi ya beto, wapi mutindu. . . Beno zaba ti ntwadisi ya beto vwandaka muntu ya bimvwama? Bantu yikwa zaba yawu? Muntu ya mbongo mingi. Muntu tubaka na munu, to na zulunale to na ladyo to na televizyo to kima, Jack Benny to muntu salaka. . . Ernie Ford, mu banza ya vwandaka. Muntu tubaka ti “Tata ya yandi sadisaka yandi na bayinsi zole yina yandi kuzwaka ve.” Na kutala kuzwaka kaka bayankaka ya yawu. Wapi mutindu yandi kuzwaka yawu? Wapi mutindu mbongo yina kwizaka? Na mumbungu ya whisky, mpe malafu ya ngolo. Ya kele samu na yina yandi kululaka bampaku ya whisky mpe bima. Ya kele yina salaka yandi muntu ya bimvwama. Kima ya kieleka yina me fundisa yinsi ya beto, kima ya kieleka yina me bebisa mabanza ya bantu ya beto, kima yina me fidisa bana ya beto ya babakala na kuvwanda binwe-malafu, mpe bana ya beto ya bakento na kuvwanda bandumba, mbongo yina salaka yandi muntu ya bimvwama.

⁸¹ Kima mosi, systeme yina ya ntama ya Jezabel, kima mosi yina kwamisaka bantu ya beto, kima mosi yina salaka bawu kukima (Romanisme) mpe nyengisaka bawu mpe kabulaka bawu mpe salaka nyonso na bawu, menga mosi ya ba-martyr (Biblia ke tuba) kele na kati ya yandi! Bawu yina, me kwelana kintwadi. Mpe beto ba-Américain ke na kukwenda na ntwala na kulembaka, “Oh, mbote, beto kele na mwa ba-dollar mingi mpe beto ke na kuzwa ntangu mosi ya mbote. Beno me lutila bayinsi nyonso yankaka.” Kasi, mpangi, beno vingila kaka fyoti.

⁸² Beto baka yawu mukanda na manima ya mukanda ntangu yayi, baminuti fyoti yina ke landa, beno mona yina kusalamaka.

⁸³ Milongi me landa, me fukama kaka na ntwala ya bawu, me kwenda kaka na bawu, sysiteme nyonso. Sysiteme nyonso ya Israel vwandaka tambula kintwadi na Jezabel. Bawu vwandaka na mutindu, yinga. Mpe Biblia ke tuba ve na beto ti na bilumbu yayi ya nsuka beto ke vwanda “na mutindu ya kinzambi”? Baprofesi nyonso me salama, mpangi, beto me kuma na nsuka! Landila yinsi, beto me kuma na nsuka! Na mutindu ya kimpeve, beto me kuma na nsuka! Sysiteme nyonso me kuma na nsuka ya

yawu! Kima ke landa kele nkwizulu ya Mfumu mpe kunatama ya Dibuundu.

⁸⁴ Nzambi me fidisa kidimbu nyonso, mambu nyonso ya ngitukulu, me sala nyonso yina Yandi lendaka sala, na kumeka na kubenda bantu, mpe ntangu nyonso bawu me landila na kudyama. Beno tala mbanza yayi awa. Beno tala yinsi yayi awa, na makumi ya bankama mpe bankama ya ba-Pentecotiste; mpe samu na kutelamaka na Kieleka, wapi kisika bawu kele na manima ya midi yayi? Samu muntu tubaka na bawu na kuvukana ve na lukutakanu. Beno bantu ya mawa, na beno mosi. . . Nzambi tala beno kyadi, kaka yina mu lenda tuba. Ntangu beno Miklisto kele dyaka ve na mukwa kana ti yawu, beno kele na musoma na kisika ya mukwa. Kieleka! Yina beto kele na yawu nsatu kele “kulonga Nsangu ya mbote na meno,” yina ke zenga kima na bitini-bitini. Beno me kwenda kaka mutindu bayankaka ya bawu, na yina beno ke kukiyufula samu na yinki beto ke looka samu na yawu. Na manima, beno me mona, beno ke kuzwa “madidi na mapeka.” Mu ke vingila yawu, kieleka.

⁸⁵ Nyonso yayi kusalamaka na Israel. Na nsuka, kilumbu mosi, kubasikaka na ntoto ya kuyuma na kutambula ya kilo, kwizaka muntu na kutala kiboba ya bansuki mingi, Elie ya Thischbite. Yandi basikaka ata mbala mosi ve na mosi ya ba-organisation, yandi basikaka na ntoto ya kuyuma! Yandi vwandaka ve na kima ya kusala na bawu. Yandi vwandaka profete ya Mfumu. Mpangi, yandi ningisaka kimfumu yina ya Jezabel samu na nyonso yina vwandaka na yawu. Bawu yinaka yandi. Yandi vwandaka na ata kimvuka ve, mu ke siamisa beno yawu. Biblia ke tuba ti ve. Kieleka. Yandi “yokaka” bawu mu banza, ba-Jezabel na bizizi ya kupakula. Yandi me tula soka na mwanzi ya yinti mutindu Jean kusalaka, bitini ya yinti me kubwa kisika nyonso ya me zola, kasi yandi me tula yawu na kati kuna. Yandi ningisaka yinsi, na kulakisaka ti bawu vwandaka na foti, mpe vwanda meka na kuvutula bawu na Nzambi ya kieleka ya moyo, mpe kuvutula na Ndinga ya Yandi na kisika ya kisambu ya Jezabel.

⁸⁶ Yinki bawu salaka? Bawu kuzwaka yandi? Bawu yinaka yandi! Kasi Ndinga ya yandi kusamunaka kaka mutindu mosi, samu ti yandi vwandaka na MUTINDU ME TUBA MFUMU! Nzambi vwandaka sala na yandi, mpe vwandaka lakisa ti yandi vwandaka profete ya kupakulama na nzila ya bima yina yandi tubaka yina vwandaka salama. Mpe nyonso yina yandi vwandaka sala vandaka lakisa ti yandi vwandaka profete ya Nzambi. Kasi dyaka bawu zolaka ve kukwikila Yawu, samu ti yandi vwandaka mwangisa bayinzo ya bawu ya bansaka. Yandi tubaka na bawu ti bawu vwandaka na foti. Achab vwandaka kisadi. Kieleka! Mpe beno tala bawu kwikilaka yandi ve, kasi yandi longaka Yawu kaka mutindu mosi. Ata mosi ya milongi kuwisanaka na yandi, yandi tubaka, “Mu kele kaka yandi yina

me bikana, Mfumu. Tala bawu, ba zola mpe ve . . . mosi, ata muntu mosi ve ke vukana.” Kasi yandi vwandaka na kusalu ya kusala mpe yandi salaka yawu. Yandi vwandaka na Ndinga ya Mfumu, MUTINDU ME TUBA MFUMU! Mpe yandi teleminaka yinsi, yandi teleminaka dibuundu, yandi teleminaka nyonso yina vwandaka, mpe Nzambi vwandaka na yandi!

⁸⁷ Ba silaka beto, na bilumbu ya nsuka, ti yandi ke vutuka na yinsi yayi mpe. Mu zaba, Yesu, ntangu . . . Matthieu 17, ntangu ba yufulaka Yandi, “Samu na yinki misoniki ke tuba, ‘Elie . . .?’”

⁸⁸ Beno tala mbote yina Yandi tubaka, “Kieleka Elie fwana kwiza ntete,” na ntangu me luta, na nta- . . . na ntangu ya ntwala. Kasi kuna Yandi pesaka Jean mutindu kifwani. Jean vwandaka ve Malachie 4. Jean vwandaka Malachie 3, “Beno tala, mu me fidisa munati-nsangu na ntwala ya Munu, samu na kuyidika nzila.”

⁸⁹ Na Malachie 4, Yandi tubaka, “Ntete kilumbu ya nene mpe ya mpasi ya Mfumu kukwiza, ntangu ntoto nyonso ke yokama na tiya mutindu matiti ya kuyuma; na ntwala ya kilumbu yina, mu ke fidisa Elie.”

⁹⁰ Mpe ya vwandaka ve Jean, samu ti Mfumu yokaka na tiya ata mbala mosi ve ntoto ntangu Jean kwizaka. Mpe kana beno tala, mpe na kapu ya nsuka, na nzila ya nsuka, Yandi tubaka, “Mpe yandi . . .” (beno tala mbote: *yandi* ke na kutubaka) “. . . ke vutula bantima ya batata na bana, *mpe* bantima ya bana na batata.”

⁹¹ Ntangu yayi beno tala mbote! Jean ya ntete kwizaka, Elie ya ntete, yinki yandi salaka? Yandi kwizaka mpe nataka Nsangu mpe yandi vutulaka bantima ya ngolo ya ba-orthodoxe ya ntama na lukwikilu ya dibuundu ya ntwenya, bana. Kasi ntangu Elie yina ke landa ke kwiza, na ntangu ya nsuka, yandi ke vutuka mpe ke baka bantima ya batata . . . bantima ya bana, mu zola tuba, mpe kuvutula bawu na Lukwikilu ya batata ya pentecote. Beno me mona luswaswanu? Yandi ke vwanda ve mosi ya bayayi awa yina kele *ya nkumbu* yina kele na beto bubu yayi, yandi ke vutuka kaka na Actes 2 mpe kubanda kuna. Yandi ke longa Nsangu ya mbote ya kukondwa mvindu, ke tuba kaka bima yina Pierre salaka na Kilumbu ya Pentecote, samu ti yina yandi tubaka na Pentecote me siamisa Masonuku nyonso yankaka. Ntangu Elie ke kwiza, yandi ke baluka ve na organisation mosi. Yandi ke yina bakento mutindu Elie salaka, kaka mutindu . . . to bakento ya yimbi, kaka mutindu Jean kusalaka. Yandi ke vwanda muntu ke zola mfinda kaka mutindu bawu vwandaka. Yandi ke katula muntu ve. Beto ke na kuingila yandi kukwiza. Yandi ke kwiza! Nzambi tubaka ti yandi ke kwiza, mpe yandi ke vwanda awa!

⁹² Mu ke kwikila, kana kima, Nsangu yina beto kele na yawu bubu yayi ke kwiza na ntwala ya nkwezulu ya nene ya yandi.

Yinga, tata! Yandi kele na nzila ya yandi, me butuma yimeni. Mutindu Elie vwandaka, mpe yina basikaka mbala mosi na ntoto ya kuyuma, ya kele na kisika yandi ke sala yandi mosi kuzabana. Yandi ke longa Actes 2. Yandi ke vutula Lukwikilu ya batata yayi ya ntama ya Pentecote mbala mosi na manima na . . . lukwikilu ya bana yayi ya Pentecote, kuvutuka na Lukwikilu ya batata ya Pentecote. Yandi ke vutuka mbala mosi, na Actes 2, na Actes 2:38, nzila nyonso. Yandi ke nata Nsangu ya mbote ya kieleka, ya kukondwa mvindu. Yandi ke vwanda ve na kima ya kusala na Jezabel mpe sysiteme ya yandi. Yandi ke vwanda kisadi ya Nzambi. Kieieka ke vwanda! Biblia ke tuba ti yandi ke kwiza. Yandi ke pesa profesu mpe ke mwangisa Nsangu ya yandi na kizizi ya ba-Jézabel yayi, kaka kieleka mutindu Elie salaka na mbandukulu ya Israel. Ba ke yina yandi! Ba ke vukana ve na yandi. Ve, ve. Yandi ke kwiza! Nzambi silaka yawu, mpe yandi ke kota na kisalu. Yandi ke—yandi ke longa na Dibuundu ya Kusoola mutindu Yawu tubaka yandi ke sala, ke ningisa Musoolami yina, ke katula nyonso ya yandi ya nsuni, yinza mpe nyonso, ke ningisa yandi samu ti yandi kukangama mbote, ke bedia yandi, ke vukisa Dibuundu kintwadi, bantu.

⁹³ Mu zaba ti beno ke tuba, “Yina kele denomination ya munu.” Mpangi, nge kele luvunu! Jean kwizaka mutindu sysiteme ya muntu mosi samu na kukotisa Muntu Mosi: Yesu Klisto. Mpe Elie ke vwanda ve sysiteme mosi, ya ke vwanda muntu, Yesu tubaka mutindu yina. Ya ke vwanda muntu mosi ya kupakulama na Mpeve-Santu. Mpe yandi ke kotisa ve banzambi tatu to yiya, yandi ke kotisa Mosi: Mfumu Yesu Klisto, samu ti Nsangu ya yandi ke ningisa bana ya Pentecote na Lukwikilu ya batata dyaka.

⁹⁴ Beno ke bambuka moyo, mpangi, kana mu tuba bima yayi na kuvwanda yimbi, mu fwana vwanda na autel. Mu ke tuba na beno, “MUTINDU ME TUBA MFUMU!” Kana Nzambi me siamisa ve ti mu me tuba na beno Kieleka, na bisika nyonso na yinsi, na yinza ya muvimba, na yina beno tuba na munu kisika foti vwandaka. Mu ke tuba na beno Kieleka! Beno vutuka na Nzambi, na nswalu nyonso! Beno basika na basysiteme yayi, samu ti Biblia ke tuba na Buku ya Apocalypse, ti bukimfumu ya Katolika ya Rome vwandaka “kento ya kindumba,” mpe yandi vwandaka “mama ya bakento ya kindumba.” Yinki ya kele? Mabuundu, basysiteme.

⁹⁵ Mpe wapi kisika dibuundu ya ba-Methodiste, wapi kisika dibuundu ya ba-Lutherien kukatukaka? Wapi kisika ba-Methodiste, ba-Baptiste, wapi kisika ba-organisation nyonso kukatukaka? Nzambi bongisaka ata mbala mosi ve dibuundu. Dibuundu ya Katolika tubaka ti bawu bandaka ntama kuna, “Yesu bongisaka dibuundu.” Mu zola—mu zola page ya disolo, to page ya Biblia. Ya vwandaka na ata organisation mosi ve bamvula nkama tatu na sambanu na manima ya lufwa ya

ntumwa ya nsuka, na manima bawu salaka Lukutakanu ya Nicée mpe salaka organisation. Mpe ntangu Luther kubasikaka... yandi vwandaka muntu ya nene ya Nzambi, kasi kaka na ntangu yandi kwendaka, mwa kimvuka yina ya bantu kwendaka mpe salaka organisation yankaka. Na yina Mpeve-Santu kwizaka na zulu ya John Wesley, yandi ata mbala mosi ve kubongisaka kima, kasi na manima yandi me kwenda na manima bawu me bongisa. Na manima Mpeve-Santu kwizaka na ba-Pentecotiste, mpe bawu basikaka na ba-Methodiste. Mpe yinki kusalamaka? Na manima *bawu* salaka organisation.

⁹⁶ Kasi ya ke vwanda na sysiteme ya muntu mosi yina ke kwiza na ngolo mpe kupakulama ya Elie, samu na kulungisa profesi. Alleluia! Yandi ke ningisa yawu. Mpe, beno bambuka moyo, yandi pesaka profesi na bawu, mpe pesaka profesi, mpe tubaka na bawu mambu nyonso, mpe Nzambi salaka na yandi. Kasi Nsangu ya yandi ya nsuka vwandaka kutelemina Yinzo ya Mpembe. Uh-huh. Ntangu Jean kwizaka, Nsangu ya yandi ya nsuka vwandaka kutelemina Yinzo ya Mpembe ya kilumbu yina. Nsangu ya nsuka ya Elie, ntangu yandi kulumukaka na nzila yina na suka yina na manima ya kuvwanda na Mvwandulu ya Nzambi kuna, yandi kulumukaka nzila ya fuluka na bansuki na zulu ya yandi, yinti ya yandi ya dibasi vwandaka lezima, mandefo vwandaka pepa na mupepe, mwa meso yina, ya ntama vwandaka ngenga na nkembo ya Nzambi. Mukawa yina na diboko ya yandi, mpe kutambula ya yandi kaka ngolo mutindu ya zolaka vwandaka. Yinki yandi ke na kusala? Yandi ke kulumuka na kukatuka Samarie na ntuala ya Yinzo ya Mpembe, mpe tubaka, “MUTINDU ME TUBA MFUMU!” Yandi vwandaka na boma ya kima ve. Mabuundu mangaka yandi, bantu mangaka yandi, na yawu yandi ke pesa ntelamanu ya yandi ya nsuka, na zulu ya Yinzo ya Mpembe.

⁹⁷ Kuna yinki ke salama? Beno kuwa! Na manima ya ntelamanu yina, ndinga ya yandi kumaka swi, muntu ve kuwaka dyaka yandi. Nzambi katulaka yandi na kisalu, yandi tubaka, “Elie, nge me sala ti Nsangu ya nge kuzabana na Israel nyonso, bawu zaba Yawu. Ntangu yayi kwiza awa na ntoto ya kuyuma, beno kwenda ntama na bawu, kabuka na bawu samu ti Mu ke sala kima mosi. Mu ke lakisa bawu yinki ya kele na kulosa Nsangu ya Munu.” Yinki salamaka? Mvita, nzala, nsatu.

⁹⁸ MUTINDU ME TUBA MPEVE-SANTU, “Beno tala mbote yina ke na kukwiza! Beno tala mbote yina ke landa! Ya vwandaka na nzala, ya *ke vwanda* na nzala!” Oh, ya lendaka vwanda ya dimpa ve, kasi ya kuwa Ndinga ya Nzambi mpe Kieleka ya Yandi. Mabuundu nyonso ke vukana mpe ke kota mbala mosi na kati ya yawu kaka mutindu mosi, mutindu kaka ti bawu me yalama yimeni na yawu.

⁹⁹ Yinki Elie salaka? Yandi talaka mukelo ya kubumbana, na zulu mingi ya mongo kisika yandi kuzwaka mwa Maza ya

Luzingu, Baluzayikisu ya Kinzambi yina katukaka na Nzambi na yina yandi vwandaka ya kuvwanda kuna na yisi ya ngolo ya Nzambi. Baluzayikisu vwandaka mwa mukelo ya kubumbana yina, na yina bayankaka ya bawu vwanda kufwa na nzala. Ti Nzambi sakumunaka bisadi ya Yandi (bangoy-ngoy yina), bawu vwandaka natila yandi kima ya kudya na yina yandi kabukaka na bantu. Mpe bawu vwandaka kuna vwandaka na nzala ya reveil mpe nyonso yina vwandaka salama. [Kisika ya mpamba na bande—Mu.] “Beto ke kuwa dyaka ve ba-reveil ya yandi na . . . Wapi kisika kele kiboba ke zolaka kudasuka yina ke teleminaka ba-organisation ya beto? Wapi kisika yandi kele ntangu yayi?” Bawu zabaka ve. Yandi bendaka yandi mosi na Nzambi, kuna na kisika ya kukabuka kisika bawu vwanda kuwa ve ndinga ya yandi. Na manima bawu bandaka na kumona.

¹⁰⁰ Ntangu Nzambi ke fidisaka Nsangu mpe ke tuba na bantu, mpe ti bawu kuyamba Yawu ve, na yina Yandi ke katula kisadi ya Yandi mpe ke fidisa bampasi ya Yandi: nzala, lufwa (na nzonzolo ya kimpeve, mpe ya nzutu). Beno tala mbote nkokoso ya kimvwama, mpangi. Beno banza ti beno me mona kima, beno vingila kaka na manima ya mwa ntangu fyoti. Beno me mona kima ve. Beno banza ti beno ke kufwa samu na reveil ya mbote ya kimpeve, beno vingila kaka na manima ya mwa ntangu fyoti. Beno vingila kaka, beno ke sosa mpe ke dila na kuwa Ndinga ya Nzambi. Biblia me tuba yawu! “Ya ke vwanda na nzala na bilumbu ya nsuka,” tubaka profete, “mpe kaka ya dimpa mpe maza ve, kasi na kuwa Ndinga ya kieleka ya Nzambi.” Kasi ndinga yina ke vwanda swi, na ntoto ya kuyuma kisika mosi kuna, na ya kubumbana.

¹⁰¹ Yandi pesaka lutumu na bangoy-ngoy, bisadi ya Yandi. Lusakumunu na bandeke yina, bisadi ya Yandi, yina bumbaka moyo ndinga ya—ya Elie na ntangu ya yandi—yandi ya kukabuka na dibuundu. Bangoy-ngoy vwandaka natila yandi nsuni mpe dimpa na suka, mpe nsuni mpe dimpa na nkokila, mpe yandi vwanda kunwa maza na mwa yinto yina na yina bayankaka ya bawu na yisi kuna vwandaka kondwa madya mpe maza ya kimpeve.

¹⁰² Mpe kilumbu mosi, na manima disumu salaka mambu ya yawu, mpe ti Nzambi me nata bantu ya Yandi na makulu ya bawu. . . Jezabel bakaka nyonso, yandi zimbisaka yawu nyonso, mpe yandi ke sala yawu diaka! Ya kele MUTINDU ME TUBA BIBLIA YA SANTU YA NZAMBI, “Yandi ke sala yawu dyaka.” Yandi kele ntangu yayi na zulu ya kiti ya kimfumu, na manima ya kimonikisi; na kubalulaka yawu mutindu yandi zola, muntu ve ke sutope yandi. Kieleka, muntu ve ke sutope yandi ntangu yayi, samu ti yina bawu lendaka ve na kuzwa na baselekele ya nsambulu bawu me zenga yawu—me zenga yawu na kukotisa nyonso na bapolitiki, mpe kuna bawu lendaka yawu. Uh-huh, ya kele kieleka yina bawu salaka. Na yina, politiki ke vwanda

ngolo ya kuyala kieleka kaka samu na kukota na kidimbu ya kibulu, kieleka mutindu mu kele ya kutelama awa, beno me mona, mutindu Biblia ke tuba.

¹⁰³ Mu zaba ti ngunga me kwenda ntama, mu ke sala mbangu. Mu fwana baka mpova ya nsuka yayi, kana Mfumu pesa munu muswa.

¹⁰⁴ Beno tala mbote! Elie vwandaka na zulu kuna tii Nzambi katulaka yandi. Yandi kuzwaka ata reveil ve. Yandi vwandaka longa na kuteleminaka kima ve. Yandi telamaka kaka kuna na Nzambi, kuna na ntoto ya kuyuma, samu ti yandi vwandaka muntu ya mfinda. Yandi kulaka na mfinda. Mutindu mosi Jean kukulaka na mfinda.

¹⁰⁵ Yandi kwendaka na ntoto ya kuyuma yandi mosi na Nzambi, ba nataka yandi ntama ya dibuundu na manima yandi me pesa Nsangu ya yandi. Mpe dibuundu mangaka Yawu, mangaka Yawu. Mpe na nsuka ba-organisation zolaka sala kima ve, na yina yandi zolaka kwenda kaka ntama. Nzambi katulaka yandi na kisalu, me nata yandi kuna na ntoto ya kuyuma, na kutubaka, “Kwiza awa, bawu ke kuwa dyaka ve. Kwiza, na yawu mu ke losa lufundusu ya Munu na zulu ya bawu.” Oh, yinga, yandi ke vwanda awa mosi ya bilumbu yayi, beno tala mbote.

¹⁰⁶ Na yina, na manima ya bilumbu ya profesi ya yandi, yinki kusalamaka? Dibundu talaka mpasi, boma ya nene ya Jezabel, yandi bakaka bawu nyonso na kati ya yandi, kufwaka bawu nyonso. Bakaka bawu na yandi, mpe tungaka biteki mpe nyonso yankaka.

¹⁰⁷ Kasi, kilumbu mosi, Nzambi basisaka dyaka yandi kuna! Awa yandi me basika. Beno kuwa mbote-mbote ntangu yayi, mpe beno dasukila munu ve. Mu ke tuba, “MUTINDU ME TUBA MFUMU!” Ntangu yandi basikaka, yinki Nzambi salaka? Yandi fidisaka yandi na mufwidi ya kento. Kento yina na ntama bakala vwandaka na lutumu na zulu ya yintu ya yandi, kasi ya lombaka lufwa samu ti yandi kuzwa kimpwanza ya yandi ti yandi kwikila Ndinga ya profete. Beno ke tala yawu? Yandi vwandaka na bakala yina vwandaka twadisa yandi na nzila yayi mpe nzila yina, na mosi ya balukolo kuna. Kasi na kati ya ntangu ya nene ya kukawuka yayi, yandi kufwaka, lufwa kubakaka yandi. Yandi vwandaka dyaka ve ya kukangama na organisartion mosi, na yawu yandi vwandaka ya kukubama ntangu yayi na kuwa Ndinga ya Mfumu. Kento, zola kutuba Dibundu; mufwidi ya kento, yina bakala ya yandi (organisation) kufwaka, mpe yandi vwandaka banza ti yandi ke zinga kaka yandi mosi. Mpe Nzambi tubaka, “Kwenda na yandi ntangu yayi, yandi ke kuwa nge, mu me pesa yandi lutumu.”

¹⁰⁸ Oh, beto ke banzaka bantangu yankaka, beno mwa nkonga yina kele ya kukwikama mingi mpe ke salaka nyonso yina beno lenda na kuzwa lukutakanu, samu na kumeka na kulakisa

na bantu ti ntima ya beno kele mbote mpe beno zola bawu kuvwanda mbote, beno ke banza ti beno ke na kuzwa ntangu mosi ya mpasi. Kasi, beno bambuka moyo, Nzambi kele na disu ya Yandi na zulu ya beno! Beno zola Yandi, mu zaba ti beno zola Yandi, kana beno zolaka vwanda awa ve, beno zolaka vwanda ve na kima ya mutindu yayi. Nzambi kele na disu ya Yandi na zulu ya beno. yinga!

¹⁰⁹ Mpe ntangu yandi salaka, bakala ya yandi kufwaka, organisation ya yandi kufwaka, na yawu ntangu yayi yandi me kubama na kuwa Ndinga ya profete. Na yawu ntangu profete kwizaka na mwelo mpe lombaka yandi mwa maza, yandi kwendaka baka yawu. Na yina yandi tubaka, “Natila munu kitini ya faline.”

¹¹⁰ Mpe yandi balukaka mpe tubaka, “Mutindu Mfumu ke zinga, mu kele na kima ve kasi kaka yina me bikana.”

¹¹¹ Ntangu yayi, ya vwandaka talana mutindu ti ba fidisaka yandi na kubaka ndambu yina vwandaka na yandi, kasi ya vwandaka mutindu yankaka. Ntangu yandi vwandaka zola kupesa yina yandi zolaka na kusadisa Ndinga, Nzambi dikisaka yandi. Mpe kana beno zola kupesa yina Mpeve kele na beno, yina Mpeve yina Nzambi me pesa beno na kusadisa Ndinga, na yina Nzambi ke bumba beno ya moyo. Alleluia! Oh, nkembo na Nzambi! Beno ke mona yawu, dibuundu? Beno banza ve ti mu kele kidi-kidi, mu kele ve. Kasi yina kele na beno, yina fyoti beno ke kwikila na Nzambi, yina lukwikilu kele na beno, beno tula yawu na Ndinga, na organisation ve! Beno tula yawu na kati ya Ndinga ya Nzambi, Yandi ke bumba beno ya moyo.

¹¹² Yandi vwandaka ya kukubama kuna, samu ti na ntama ve, samu ti ba zolaka pesa yandi ve muswa. Kasi ntangu yayi yandi me kubama. Yandi ke ndima yawu? Nzambi fidisaka profete na nzila ya yandi. Yandi ke ndima Ndinga ya yandi? Yandi ke yamba profete yayi? Inga, yandi salaka yawu. Mpe yandi tubaka na yandi, yandi tubaka, “Ntangu yayi, luzingu ya fyoti yina kele na nge, tula yawu na kati awa, nata ntete yawu na munu.” Mpe yinki kusalamaka? Na yina bayankaka ya yinza vwanda lemba mpe vwanda kufwa na nzala, yandi mpe bana ya yandi mpe dikanda ya yandi nyonso vwanda kudya bambala tatu na kilumbu, Luzayikisu ya Kinzambi ya Ndinga. Mu banza ti beno ke mona yawu, bankundi.

¹¹³ Yinki kusalamaka? Yandi vwandaka kuna tii nzala kumanisaka, vwandaka zinga na kento yayi (Dibuundu yayi) yina yambaka yandi mpe kwikilaka Ndinga ya yandi. Mpe yandi bumabaka yandi ya moyo (bumbaka Dibuundu ya moyo) na Ndinga ya Mfumu, samu ti yandi tubaka “MUTINDU ME TUBA MFUMU.”

¹¹⁴ Ntangu yayi, beto kele na ntangu ve ya kutubila yina me bikana ya disolo, beno zaba, mutindu yandi zolaka kwiza na

kisika ya kuteza na Baal. Yandi ke sala yawu, mosi ya bilumbu yayi, beno vwanda na boma ve. Ntangu yandi basikaka na kutambulaka na ngolo na ntoto ya kuyuma yina, beno talaka mbote yina salamaka.

¹¹⁵ Yinki kusalamaka? Na yina, ntangu Elie, kiboba ya mbote yayi, ya profete, kisadi ya kieleka ya Nzambi, kumaka na nsuka ya nzila ya yandi, Nzambi tubaka na yandi, kilumbu mosi, tubaka, “Elie, nge me longa bilumbu mingi ntangu yayi. Nge me nwanila Jezabel mpe mpe kupakula ya yandi nyonso mpe nyonso tii nge ke lenda dyaka yawu ve.” Yandi tubaka, “Kwiza na Jourdain!” Mpe awa yandi me kwenda, me kwenda na Jourdain. Kuna yinto ya ntama ya poto-poto yina ke kulumuka kuna, maza ya madidi, na bagalasi, mutindu muntu nyonso fwana kukutana: Jourdain, lufwa.

¹¹⁶ Kasi ntangu kisadi ya nene yayi ya Nzambi kulumukaka na Jourdain, mpe mwana ya yandi ya bakala vwandaka tambula pene-pene ya yandi, mwana na Nsangu ya mbote, . . . Oh, yinga, yandi vwandaka mwana ya yandi ya bakala, “Tata ya munu, tata ya munu, bipusu ya Israel, minapi-mpunda ya yawu.” Ntangu yandi na mwana ya yandi ya bakala vwandaka tambula diboko na diboko, kuna na Jourdain, yandi vwandaka tala mbote papa ya yandi kukwenda na suka yina.

¹¹⁷ Ntangu yandi kumaka na Jourdain, yandi tandaka diboko mpe bakaka robe yina ya ngolo na mapeka ya yandi, yandi tubaka, “Lufwa, nge lenda sala kima mosi ve na munu.” Mpe yandi bulaka Jourdain, “Zibuka, mu ke sabuka na suka yayi.” Yinki salamaka? Yandi vutukaka manima mpe yumaka mutindu mfututu. Yinki vwandaka sala profete ya kiboba yayi? Yandi vwandaka tala na simu ya Jourdain, yandi zabaka ti ya vwandaka na kipusu vwandaka vingila yandi na lweka kuna na bampunda. Yandi vwandaka kwenda na yinzo, kusalu ya yandi vwandaka me suka. Mwana ya yandi ya bakala na Nsangu ya mbote vwandaka baka kisika ya yandi.

¹¹⁸ Mu vwanda kwiza na yinzo kilumbu yankaka yina na kukatukaka Wesete. Yayi ke na kukwiza na mabanza ya munu. Mu namisaka ladyo (Mu zolaka nata ditoma bilumbu tatu, bakilometele mafunda tatu na bankama nana na makumi sambanu na zole, munu mosi). Mu namisaka ladyo mpe mu . . . vwanda kuwa minkunga ya lukwikilu yina vwandaka katuka na Del Rio, na Texas. Ya vwandaka na muntu vwandaka zonzila na yina me tadila, mundombe mosi, muntu mosi ya kiboba ya ndombe. Yandi vwanda yilama na kufwa mpe yandi zolaka kwiza na nzadi, yandi tubaka, “Basapatu ya wolo yayi yina mu ke lwata, samu na kutambula na babala-bala ya wolo.” Kiboba ya ndombe yayi kulongaka luzingu ya yandi nyonso mpe kima kaka yandi zolaka banza yina vwandaka pesa yandi ngolo, yina vwandaka na yandi, vwandaka banjo ya yandi ya ntama yina vwandaka ya kulelika na kibaka. Yandi vwanda

vwandaka na zulu ya ba-balle ya coton mpe vwanda bulaka minkunga, vwanda pema yandi mosi na ksalu ya yandi, na banjo ya ntama. Ya vwandaka mutindu yina yandi vwanda, pemaka. Yandi tubaka ti mpunda ya nkufi yina yandi vwanda nataka ke vwanda kuna na kipusu. Mu vwandaka banza na yawu. Yandi tubaka, “Basapatu ya wolo yayi yina mu ke lwata, samu na kutambula na babala-bala ya wolo.”

¹¹⁹ Mpe ntangu yandi manisaka kuyimba, mu kufwaka ladyo. Mpe vwandaka nata ditoma kuna, na kusimbaka volant. “Oh, ya kele kieleka. Mu fwana kulumuka kuna mpe. Yinki ke pes munu ngolo? Wapi kisika mu ke kuzwa ngolo ya munu na ntoto ya kuyuma?” Mu kele na mwa, munduki yantama yina nkumbu kele. . . Mu ke zombaka na yawu na automne ya mvula. Ya kele .270, ya modele 721, Remington. Muntu mosi, mpangi mosi ya bakala, pesaka munu yawu, na Californie, bamvula me luta. Mu me zombaka na yawu bamvula mpe bamvula. Mutindu. . . wapi mutindu ya ngolo ya vwandaka, samu ti mu—mu zaba ti ya kele munduki ya mbote yina ke kubulaka mbote, mpe ya kele ngolo ya munu na ntoto ya kuyuma.

¹²⁰ Na yina mu banzaka na vision ya munu. Ntangu mu kumaka kuna mpe monaka bantu ya munu nyonso, mu kuwaka kima kuboka, mpe awa kwizaka mwa Mwana ya munu ya ntinu (mwa mpunda ya munu ya selle) mpe me tula yintu ya yandi na zulu ya dipeka ya munu. Mu banzaka, “Yinga, mosi ya basuka yayi mu me kulumuka mpe, na Jourdain.” Mpe .270 ya ntama yina mu vwanda sadilaka na. . .vwandaka na zulu ya kibaka. Mu katulaka yawu ve tii autone ya nsuka. “Mwa mpunda ya nkufi ya selle yina mu vwanda sadilaka na kutambula, Nzambi ke kanga yawu na kipusu ya munu, na suka yina ntangu mu ke kulumuka na nzadi.” Ya ke vwanda kaka ya kutelama na lweka kuna ya nzadi. Nzambi ke fidisa yandi, mu monaka yandi na mpimpa yankaka yina. Ba ke vukisa yandi na kipusu ya munu, mosi ya basuka yayi. Mu ke kwenda, ke mata na matuti.

Beto sambila.

¹²¹ Oh, samu na ngolo yina ya Nzambi mu ke sepela na yina mu ke tambula na babala-bala yina ya wolo! Yinga, munduki ya ntama yina ntangu yayi kele na kibaka, ke vwanda ve na ksalu kuna. Mu ke kumiyufula, kana kipusu ya munu ke kwiza, kana mwa mpunda ya munu ya nkufi ya selle yina mu monaka na vision ba ke vukisa yawu na kipusu ya munu, na suka yina, na kutelamaka kuna na nzadi. Mu banza. Mu zola kubakama na zulu. Mu zola Dibuundu kumata mutindu yina mpe, mu zola mosi na mosi ya beno.

¹²² Beno ke zola kuzaba ntangu beno ke kulumuka na Jourdain? Beno ke zola kubika basysiteme ya yimbi yayi ya yinza yayi mpe kuyamba Yesu Klisto mutindu Mvulusi ya beno? Kana beno kele ve Muklisto, beno ke zola kutelemisa maboko ya beno mpe

kutuba, “Sambila samu na munu, Mpangi Branham. Ntangu mu ke kwenda na Jourdain, . . .”? Nzambi sakumuna nge. Nzambi sakumuna nge. “Ntangu mu ke kulumuka na Jourdain, Mu zola kubaka ngolo ya Mpeve-Santu na zulu ya munu mpe kubula bamaza ya madidi, mpe kusabuka.”

¹²³ Wapi mutindu beno lenda vwanda na yisi ya kuzonza yayi, ya kupakulama ya Mpeve-Santu, mpe beno zaba ti Mpeve-Santu ke na kutuba na munu nkadulu ya beno, mpe beno ke kondwa kutelemisa diboko ya beno? Ya ke lakisa ti ya kele ntangu ya kukwenda na nzyetolo na ntoto ya kuyuma! Ya ke vwanda na muntu ntete beto sambila, muntu yankaka? Ya kele na bantu zole me telemisa maboko ya bawu; tatu, Nzambi sakumuna nge, mwana ya bakala.

¹²⁴ Tata ya beto ya Mazulu! Tatu; ya ke vwanda mbote, Mfumu, kana bawu—bawu kele kaka kuna na kilumbu yina. Mu ke sambila ti bawu vwanda, Mfumu. Bawu me telemisa maboko ya bawu samu ti bawu me ndima ti basysiteme ya yinza yayi ke na kufwa, mpe ti bandinga ya Ndinga ya Nzambi ke vwanda ntama mingi ve mpasi na kutala, Nzambi ke katula yawu na dibuundu. Kidilu, mbokolo ya Bakala ya makwela ntama mingi ve ke kwenda mpe sysiteme ya Jezabel ke kanga yawu. Kasi bawu zola kuzwa . . . kuzinga na mukelo yina ya kubumbana mutindu Elie na kubumbana na ntangu ya nzala. Nzambi, pesa bawu Mpeve-Santu ntangu yayi, fulusa bantima ya bawu na kyese mpe ngemba, mpe tula mabanza ya bawu na zulu ya Ndinga ya Nzambi ti bawu lenda zinga ntangu yayi mpe awa na nsi, kukondwa nsuka. Sakumuna bawu, Tata. Bawu kele ya Nge, na nzila ya Yesu Klisto Mfumu ya beto.

Na bayintu ya beto ya kukulumusa:

¹²⁵ Bayina me telemisa maboko ya bawu mpe zola kundima Klisto, beno ke zola kaka kutelama, kaka mwa fyoti, na yina mu ke sambila samu na mosi na mosi ya beno? Beno telama kaka.

¹²⁶ O Nzambi, mu me kondwa? Ata tatu yina telemisaka maboko ya bawu, kukondwa kundima na kutelama na kundima kima ya kieleka yina bawu me sala. Mfumu Yesu, mu me pesa yawu nyonso na maboko ya Nge. Mu me longa Ndinga ya Nge, mpe mu me vukisa ve na kima mosi. Ntangu yayi mu—mu ke bika yinzo yayi na bawu, Tata. Nge sala nyonso me lunga na bawu nyonso zole dibuundu mpe kisadi ya Nge, ya kele nyonso na maboko ya Nge.

¹²⁷ Tata, mu ke sambila ti Nge vuukisa bayina me zimbana, fulusa ntima ya nsatu na bima ya mbote, pesa Luzingu ya Kukonda nsuka na bayina kele na mpwila, telemisa bisadi ya Nge samu na kusamuna Nsangu, pesa kubeluka na bambevo mpe bantu ya mpasi, kuzwa nkembo na Nge mosi, samu ti mu me kukipesa munu mosi na Ndinga ya Nge. Mpe ti na diboko ya munu, mpe na kati ya ntima ya munu, mpe na dibanza ya munu,

nge sonika Misiku ya Nge, na nzila ya Yesu Klisto Mfumu ya beto. Amen.

Na ntangu mu ke kuma na nzadi na nsuka ya kilumbu,

Mu zola kuyimba yawu ve.

Mpe ya ke monana ti bankundi ya munu me kwenda;

Ya ke vwanda na Muntu ke vingila yina ke lakisa munu nzila,

Mu ke sabuka ve Jourdain munu mosi.

¹²⁸ Nge kabulaka bakalati ya bisambu, Bill? Mu me kuwa kilo. Yinki nge kabulaka bubu yayi? B? Nge kabulaka mpe ba-A, mutindu yina ve? Mbote mingi, beto ke bokila ntete ba-B, mosi na . . . Kalati ya bisambu B, numelo ya ntete. Beto ke sambila samu na kimbevo na nge. B, numelo ya ntete, nani yawu kele? Kalati ya bisambu B, numelo ya ntete, muntu mosi kuna na manima. Kwiza awa, mama. B, numelo ya zole, telemisa diboko ya nge. Mama yina? Numelo ya tatu. B, numelo ya tatu, nge zola kutelemisa diboko ya nge, samu mu mona kisika ya kele. Tatu? Numelo ya yiya, B, numelo ya yiya. B, numelo ya tanu. Nge zola kutelemisa diboko ya nge? B, numelo ya tanu. Bakala yina? Mbote mingi, sambanu, sambwadi, nana, yivwa, kumi, kumi na mosi, kumi na zole, kumi na tatu, kumi na yiya, kumi na tanu. Mbote, awa, ti bantu nyonso na ba-B beno telama, na mutindu nyonso. Kaka . . .

Ti . . . [Kisika ya mpamba na bande—Mu] . . . kwendaka na yinza ya muvimba, konso missionary na bilanga ya kulonga, bisika nyonso bawu lenda.

¹²⁹ Bakalati nyonso ya B beno telama mpe beno baka kisika landila banumelo ya beno.

Ntangu yayi, banani vwandaka ke landa? A? Nani kele na kalati ya bisambu A, ya ntete? A, ya ntete, wapi kisika ya kele? Kieleka ya kele na kati awa. A, ya ntete? Ya me sala bilumbu zole ba me kabula yawu, to tatu ntangu yayi, na yawu bawu lenda to ve kuvwanda awa. Beno nyonso na kalati ya bisambu A, ntangu yayi beno vwanda na mulonga na zulu awa. Beno kwenda kaka na lweka ya kibaka, na buzitu nyonso.

¹³⁰ Mu zola kuzonza na beno bayina kele ve na bakalati ya bisambu, kaka ntangu fyoti ntete mulonga kubanda.

¹³¹ Ntangu yayi, na kalati ya beno ya bisambu, beno simba yawu na maboko ya beno samu bampangi kulenda kubaka bakalati ya beno ya bisambu. Beno vwandaka vingila, beno kwizaka na ntangu ya mbote na nkokila samu na kwiza baka kalati ya beno ya bisambu, mpe na yawu beno kele na muswa ya kukota na mulonga. Mu silaka beno, ti mu ke sambila samu na beno.

Ntangu yayi mu ke meka na kuzitisa nsilulu ya munu, Nzambi kusadisa munu.

132 Ya kele mwa mwana ya nge ya bakala? Kieleka mwana ya bakala ya kitoko. Beno lemvokila munu. Kento yayi awa kele kifwani ya mbote ya kento ya kieleka ya Amerique. Mwa mwana ya yandi ya bakala, na salopette ya fyoti mpe kazaka na banzila. Ntwenya ya kento na nsuki ya yinda, ya kulwata mbote. Nzambi sakumuna yandi mpe yinzo ya yandi, mpe bakala ya yandi, baya ya yandi ya luzolo. Ya kele kieleka U.S.A. ya kieleka, na “Buklisto” ya kusonika na zulu ya yawu. Ti bilumbu mingi bayinsi ya beto kuvwanda mutindu yina! Lemvokila munu, ntwenya ya mama, na kutubaka mutindu yina, kasi mu kaka . . . samu ti bantu yina kumona yina mu banza ke talana mutindu Muklisto; ata manicure, bima yina, kaka mama.

133 Nzambi sakumuna nge, Mpangi Sullivan.

134 *Munganga ya Nene*, kana beno zola.

Munganga ya Nene kele awa,
Yesu ya mawa;

135 Beno ke kwikila na Yandi? Beno ke kwikila ti Yandi kele Munganga ya Nene? Ntangu yayi beno vwanda kaka na buzitu ntangu yayi. Beto kele dyaka na ngunga fyoti, mu vwandaka me zenga kaka nkufi nsangu. Mu banza ti beno me kuzwa yawu, na yina, yina mu vwandaka zola kutuba. Beno kwikila kaka na ntima ya beno ya muvimba. Na yina bawu nyonso ke tandama na mulonga, muntu kele kuna na manima na kukotisa bantu na mulonga. Ok? Yinki nge ke tuba? Ntangu yayi bayina nyonso kele na bakalati ya bisambu me telema.

136 Beno ke kwikila kuna, mpe, beno bayina kele ve na bakalati ya bisambu? Kana beno ke vwanda na lukwikilu, Nzambi ke bokila *beno*. Ntangu yayi, bakalati nyonso ya bisambu na mulonga.

137 Mwa mwana ya kento yina ya kuvwanda na manima kuna, na dikulu ya yimbi, na zulu awa na yayi. . . Nge ke kwikila ti Nzambi ke belusa yawu? Kana inga, vwanda kaka na lukwikilu mpe Nzambi ke pesa nge yawu.

138 Nge banza ti tata ya nge yakubela ke kuma mbote? Kana nge kwikila, nge lenda kuzwa yawu.

139 Wapi mutindu samu na nge kuna, yina ke na kusambilaka samu na mwana-nkazi ya nge yina kele na mpasi ya ba-nerf? Nge banza ti Nzambi ke belusa yandi? Mama, ya kuvwanda kuna, kana nge ke kwikila yawu, nge lenda kuzwa yawu.

140 Beno nyonso ke kwikila?

141 Ntangu yayi mu zola. . . Bantu yikwa ya bampangi ya munu kele awa, milongi ya Nsangu ya mbote, milongi ya Nsangu ya mbote ya Muvimba to nyonso yina bawu kele, bayina ke kwikilaka na kubeluka ya Kinzambi? Beno telemisa maboko

ya beno. Mu ke zola ti beno kwiza awa mpe sadisa munu na kusambila samu na bantu yayi, samu bantu kumona ti ya kele kaka munu ve yina ke sambilaka samu na bantu, beno lenda mpe. Beno kwiza awa mpe beno telama na estrade na munu. Beno zola, bampangi, beno milongi? Beno kwiza kaka awa mpe beno telama kaka na estrade. Ya kele mbote. Matondo na beno, bampangi. Matondo na beno. Kwiza kaka na ntwala, bampangi, beno kwiza.

¹⁴² Yinki nge ke tuba? [Mpangi mosi ya bakala ke tuba, “Beto lenda sala mulonga ya zole awa?”—Mu.] Yinga, nge lenda sala yawu. Kusala mulonga ya zole kaka awa, ya ke vwanda mbote. Ya kele mbote. Ntangu yayi baluka lweka yayi yankaka, mpangi ya bakala. Baluka mutindu yayi, mu ke lutisa bantu awa. Ntangu yayi bayankaka ya beno beno luta lweka yayi ya munu, kaka awa, kana beno zola, beno telama na lweka yayi. Mutindu yina.

¹⁴³ Ntangu yayi, samu na dibuundu, beno ke mona bantu ya mbote yayi awa? Ba kele bantu yina ke telama kaka awa, mpe ke telama samu na Nsangu ya mbote mosi yayi yina mu ke longaka. Beno me mona? Bawu me kwiza awa samu ti bawu ke kwikilaka na Yawu. Ntangu yayi beno fwana ndima pasteur ya beno yina ke lakisa yandi mosi na estrade yayi awa, na kulonga ya mpasi, ya ngolo yayi. Bayayi kele bantu yina kele na luzayikisu, bayina zaba ti . . . mu ke telemina bantu ve, bantangu yankaka beto ke vukanaka na basysiteme yina ke salaka beto . . . Basysiteme yina kele yina beto ke telemina; muntu ve, kisadi ya Nzambi.

¹⁴⁴ Ntangu yayi, kana beto sala kumona mabanza samu na bantu nyonso awa, bantangu yikwa beno ke banza ti mu ke vwanda awa? Mu ke lemba ntangu mu ke . . . na manima pene ya sambanu, tanu to sambanu kumi; to fyoti mingi, mu banza na ndambu, na ndambu ya ndambu, mu ke suka, bayankaka ba ke sambila ve samu na bawu. Beto lenda sala yawu ve. Mpe mutindu ya . . . kasi beno kele na nsatu ya kuzwa yawu ve. Beno zaba yina kele dyambu ya beno. Beno zaba yina beno salaka, ntangu yayi beno funguna masumu na beno. Kana mosi ya beno kele na ditona mosi ya ntembe na kati ya ntima ya beno, beno basisa yawu malu-malu yayi mpe beno tuba na Nzambi na kulemvokila beno. Kana beno kele ve ya kusungama na Nzambi, beno tuba na Nzambi na kulemvokila beno. Kana ve, mpe beno kele ya kusungama ve na Nzambi, ya ke sala beno ata fyoti ve ya mbote na kukwiza awa. Beno ke bebisa kaka ntangu ya beno. Ya kele kieleka. Ntangu yayi, ya kele kieleka, bampangi? Ya kele kieleka.

¹⁴⁵ Beno tala awa. Awa me telama Mpangi Kidd awa. Mu zolaka pasula bapine ya ditoma ya munu samu na kukuma na yandi, pene ya mvula mosi to zole me luta, na . . . Yandi vwanda kufwa na cancer, vwanda kufwa kilumbu yina. Kento ya yandi tubaka na munu, yandi tubaka, “Sala mbangu!” Yandi tubaka, “Yandi ke na kufwa ntangu yayi.” Ntangu mu kumaka kuna, Mfumu belusaka yandi. Mpe awa yandi kele dyaka ya kutelama.

Mu banza ti yandi me kuzwa *mwa-mingi* kilo mpe nyonso. Veteran ya ntama, na kilumbu yina, beno zaba. Ya vwandaka mutindu ya muntu mu vwandaka zonzila, bamvula me luta, yina vwandaka longi; mpe kangamaka kaka na Ndinga yina, mpe bantu vwandaka seka yandi. Mpe yandi na kento ya yandi vwanda tambulaka nzila masini mpe nyonso yankaka, mpe kuna na zulu ya myongo, mpe na ba-mine ya makala, mpe ba vwanda basisa bawu na nganda, mpe vwanda losa bawu na boloko, mpe nyonso yankaka. Ya kele muntu yina me nwana samu na kununga matabisi, ya kele mutindu ya muntu.

¹⁴⁶ Ntangu yayi, bampangi, mu ke tuba na beno, ya lendaka vwanda ti beno ke kuzwa ve mpeve ya kuswasikisa mabanza. Ya kele na nsatu ya kuvwanda ve, beno me mona, ya—ya kele mfunu ve. Kima ya ntete, beno kele muntu ya Ndinga. Beno kele ntama mingi, milongi ya kulutila na munu, samu ti mu kele—mu kele mingi ve ya mulongi. Kasi mu . . . kasi beno kele—beno kele ya kukusa, muntu nyonso yina ba me bokila na kulonga. Nsangu ya mbote ba me bokila yandi na kubelusa bambevo; balutumu ya nene kele: “Beni kwenda na yinza ya muvimba mpe beno longi Nsangu ya mbote na bantu nyonso. Yandi yina ke kwikila mpe ke botama ke vuuka. Bidimbu yayi ke landa bayina ke kwikila. Kana bawu tentika maboko ya bawu na zulu ya bambevo,” nyonso yina, “bawu ke beluka.” Kana ba me bokila nge na kuvwanda mulongi, ba me bokila nge na kusambila samu na bambevo.

¹⁴⁷ Mpe kikuma mu ke na kusalaka yayi kele samu dibuundu yayi . . . ti bawu lenda mona ti bawu kele na nsatu ve ya kuvingila muntu mosi ya mutindu yankaka, Oral Roberts, Tommy Hicks, Tommy Osborn, munu mosi, muntu mosi kukwiza samu na lukutakanu ya kubeluka. Mu zola bawu kumona ti beno kele bantu ya Nzambi. Beno me mona? Beno kele bantu . . . Beni kele na muswa ya kutentika maboko na zulu ya mosi na mosi ya bawu mutindu—mutindu mu to muntu nyonso yankaka. Na manima ya nyonso, bampangi, beno nyonso zaba, mutindu—mutindu milongi, ya kele lukwikilu ya bawu mosi na Nzambi yina ke salaka kisalulu. Ya kele kieleka? Beto ke sambilaka kaka samu na bawu.

¹⁴⁸ Ntangu yayi beno ke tuba, “Mpangi Branham, ya kele Mpeve ya Mpeve-Santu kuna na nge?” Kieleka. Yinga, tata!

¹⁴⁹ Ntangu yayi samu na beno bayina kele na di- . . . na mulonga kuna, kana beno kwikila na ntima ya beno nyonso ti Nzambi ke belusa beno, beno telemisa diboko ya beno, beno tuba, “Mu ke ndima yawu.”

¹⁵⁰ Ntangu yayi, kwiza awa, ti—ti mama yayi kwiza awa. Mu zaba nge ve, mu me monaka nge ntete ve. Kana Mpeve-Santu kutuba na munu, samu ti bampangi ya munu awa, na ntwala awa mutindu yayi, na yina bawu nyonso me telema awa pene-

pene ya munu. Mpe kaka yina ve, bampangi ya munu kele awa, mpe Mfumu ya munu kele awa. Ya kele Mfumu ya bawu, mpe. Ntangu yayi, kana Yandi tuba na munu kima ke tambula ve na nge, nyonso yina ke tambula mbote ve na nge, beno ke zaba kana ya kele kieleka to ve. Mu zola ti bawu, mu zola ti dibuundu, mu zola bantu kuna kumona ti Mpeve-Santu kele awa na estrade na kupesa kuswasikisa mabanza, kasi yina ke belusa muntu mosi ve. Kasi kana Yandi tuba na munu kima yina me tadila nge, nge zaba ti mu zaba kima ve, kaka mutindu ya vwandaka kento yina na dibulu ya maza . . . Mutindu mosi ve ya dyambu, kasi mu zola kutuba bakala mpe kento ke kutana mbala ya ntete. Yesu, bakala ya bamvula ya kati-kati, mpe kento yayi na kutala vwandaka ntwenya ya kento, mu banza mutindu nge.

¹⁵¹ Mpe kana Yandi zola, kutuba na munu samu na yina nge kele awa, mpasi ya nge, nge ke kwikila ti ya fwana vwanza Mpeve ya Yandi yina ke sala yawu? Beno bampangi ke kwikila yawu? Ti Mfumu Yesu kele ya kutelema awa? Beno dibuundu ke kwikila kima mosi? Beno na mulonga ya bisambu ke kwikila kima mosi, mpe zaba ti bantu yayi . . .? Mu zola bokila bawu na zulu awa kana mu banzaka ti bawu vwandaka ve . . .? Na manima ya kulonga mutindu yayi, mpe kutuba bima yina mu me tuba, mpe na manima kubokila bantu awa yina vwandaka ve ya kulunga? Mu zolaka sala yawu ve. Mu zolaka telemina kima kaka mu vwandaka nwanila. Beno me mona? Mu ke kwikila na bawu. Mu ke kwikila ti bawu kele bantu ya Nzambi.

¹⁵² Ntangu yayi beno mona kana Mpeve-Santu kele pene-pene. Kaka samu na kuzonza na beno, mu ke na kumeka . . . Beno ke tuba, “Yinki nge ke na kusala, Mpangi Branham?” Kima mosi yina Yesu salaka na kento yina, na kutubaka, “Natila Munu maza,” Yandi vwandaka meka kaka na kusolula na yandi, samu na kutala yina vwandaka dyambu ya yandi.

¹⁵³ Mpasi ya nge kele kudasuka, ya kele yina nge ke na kubelaka. Kana ya kele kieleka, telemisa diboko ya nge. Ntangu yayi, yandi ke na kulakisa yawu ve, mutindu yina ve, bampangi? Yandi ke lakisa yawu ve, kasi ya kele yina kele mpasi ya yandi. Yandi me vwanza mutindu yina bilumbu mingi. Kusabukaka ntangu nyonso bakyamvu ya nge ntete nge kuma na bawu, mpe nyonso yankaka. Ya kele kieleka. Ya kele nkadulu ya nge, ba salaka kaka nge mutindu yina, muntu ya kudasuka; nge ke banzaka ntangu nyonso kima ke na kukubamaka na kusalama, mpe ya ke salama ve. Bantangu yankaka dyabulu ke tuba na nge, “Ya kele ve na kima na kati ya Yawu, nge me vutuka kaka manima, nge me sabuka ndilu.” Mu ke na kutangaka ve mabanza ya nge, kasi mu ke na kutanga yina kele . . . Mu ke na kuzabaka yina yandi ke na kuzonzila nge, samu mu me mona yina me luta mabanza ya nge.

¹⁵⁴ Ntangu yayi, Yesu zabaka mabanza ya bawu. Ya kele kieleka? Mbote, ya kele yina me salama malu-malu yayi. Ya kele kieleka? Awa, bika mu tuba na beno kima mosi, ti beno lenda zaba.

Nge kele kieleka ya kutelema awa samu na muntu yankaka. Ya kele kieleka. Yawu dyambu, nge me mona, nge lendaka ve kusimba yawu tii kuna. Ntangu yayi, kana Mfumu ke monisa na munu samu na yina nge me telema awa, samu na muntu yankaka, nge ke kwikila ti mu kele profete ya Yandi? Ya kele samu na mama ya nge. Nge ke kwikila ti Nzambi lenda tuba na munu yina kele mpasi ya yandi? Mbote, yandi kele na mpasi na ntima, hypertension, ba-calcul biliaire, poto-poto. Ya kele kieleka, mutindu yina ve? Beno me mona? Ntangu yayi, ya kele Mpeve-Santu, mutindu yina ve?

¹⁵⁵ Ntangu yayi, ya kele na kima awa na zulu ya munu mpe na zulu ya bampangi yayi. Beno me mona? Kima mosi awa ntangu yayi, Mpeve-Santu. Ntangu yayi, beno ke kwikila; beno, na yina beto ke luta na mulonga.

Beto kulumusa bayintu ya beto na yina beto ke sambila samu na bantu yayi.

¹⁵⁶ Ntangu yayi, Tata ya Mazulu, beto ke tentika maboko na zulu ya bantu yayi. Mpe mu ke sambila samu na bawu ntangu yayi. Tala bisadi ya Nge ya kimfumu yina me telama awa, mpe beto nyonso ke tentika maboko na zulu ya bambevo, samu Nge tubaka kusala yawu. Beto ke sala yawu na Nkumbu ya Yesu Klisto. Ti bantu kuluta kaka ve na kulemba, kasi ti bawu na kuluta kubeluka na Nkumbu ya Yesu Klisto. Amen!

¹⁵⁷ Ti Mfumu kusakumuna beno. Ntangu yayi beno belama kaka.

Na Nkumbu ya Mfumu Yesu, belusa. . .Na Nkumbu ya Mfumu Yesu, belusa mpangi ya munu ya bakala. Na Nkumbu ya Mfumu Yesu, belusa mpangi ya munu ya kento.

¹⁵⁸ Ntangu yayi, vingila fyoti! Beno me mona! Mpangi ya bakala mpe mpangi ya kento, samu na yinki beno me sepela ntangu kento yina, ntangu kuswasikisa mabanza vwanda me salama, mpe ntangu bayankaka me luta kima mosi ve me salama? Bantu ke luta, “Mbote, kana mu ve, me kuzwa ve kuswasikisa mabanza, mbote, na yina mu me kuzwa kima mosi ve.” Yina kele na kima ve ya kusala na yawu, Yandi kele awa kaka mutindu mosi. Beno me mona?

¹⁵⁹ Ntangu beno ke luta awa, beno kwiza na maboko ya beno na zulu, na kutubaka, “Matondo na Nge, Mfumu Yesu. Mu ke ndima Nge mutindu Munganga ya munu, mpe mu ke vutuka kaka na yawu. Mosi ya bantu yayi ke botika munu, mu ke kota kaka na ndonga ya maza mpe ke botama, mpe kubasika kuna na kuzabaka ti Nge silaka ti mu ke kuzwa Mpeve-Santu.”

¹⁶⁰ Beno me mona, yawu. . .Kumona mabanza kele dyaka awa. Ya kele dyaka awa, kaka mutindu mosi na. . .Awa, yinki ya kele? Bakala yayi awa? Mu kele nzenza samu na nge. Mutindu yina, tata? Mu zaba nge ve. Kana. . .kana Nzambi lenda tuba na munu yina kele mpasi ya nge, nge ke kwikila ti mu kele profete ya

Yandi, kisadi ya Yandi? Nge ke kwikila yawu na ntima ya nge ya muvimba? Mbote mingi, tata. Matondo na nge, tata. Yina kele mpeve mosi ya mbote, kima mosi ya mbote mingi. Na manima ya nyonso, nge me telema awa samu na muntu yankaka. Ya kele kieleka. “Ya kele mutekolo ya nge, yandi kele na polio, yandi kubwaka kilumbu yankaka yina mpe zenganaka dikulu,” ya kele MUTINDU ME TUBA MFUMU! Ya kele kieleka? Ya kele kieleka! Kwenda mpe kwikila ntangu yayi, mpe yandi ke beluka.

¹⁶¹ Ntangu yayi, beno kwiza kaka, na lukwikilu muntu nyonso, beno kwiza kaka. [Mulonga ya bisambu me baka bamuniti tatu na basekonde makumi tatu na nana, mingi ya bampova ya Mpangi Branham ke na kuwakana mbote ve—Mu.] . . . ? . . .

Nsinga ya ngwisani kusakumuka
Bantima ya beto na zola ya Miklisto;
Ngwisani ya mpeve mosi
Mutindu yina ya Zulu.

Awa na ntwala ya Kiti ya kimfumu ya Tata ya
beto,
Beto ke tsyamuna kisambu ya beto ya tiya;
Boma ya beto, bivuvu ya beto, balukanu ya
beto kele mosi,
Bangolo ya beto mpe kukeba ya beto.

¹⁶² Beto me telama, bana ya fioti ya Nzambi, bikata, bampofo, bifuma. Milongi ya Nsangu ya mbote, beno zaba ti beto kele na ata ngolo ya kubelusa. Kasi Mfumu ya beto ya Nene Yesu Klisto me fidisa bidimbu yayi, mpe ke bedisa dyabulu yina me kanga beno. Beto ke bedisa dyabulu . . . ? . . . Beto ke bedisa bumpofo . . . ? . . .

¹⁶³ Na Nkumbu ya Yesu Klisto Mwana ya Nzambi, beto ke lomba ti Nzambi ke pesa bawu lukwikilu ya kukwikila ti kisambu ya lukwikilu me vuukisa mbevo, mpe ti Nzambi ke telemisa bawu, mpe ti bawu ke vwanda dyaka mbote. Pesa yawu, Nzambi ya Ngolo nyonso, na Nkumbu ya Yesu Klisto.

¹⁶⁴ Ntangu yayi, beno bampangi beno kwenda kuna . . . ? . . .

¹⁶⁵ Beno nyonso vwanda na kati ya kisambu ntangu yayi, na yina beto . . . milongi ke na kusambila samu na bawu, diaka, ntangu yayi. Beto ke sambila, ke tentika maboko.

¹⁶⁶ Tata ya Mazulu . . .

Samu na beno kuna na kati ya dibuundu bayina me vwanda ve na mulonga ya bisambu, beno tentika maboko ya beno na zulu ya mosi na yankaka ntangu yayi. Beno Tentika maboko ya beno na zulu ya mosi na yankaka.

¹⁶⁷ Tata ya beto ya Mazulu, beto ke na kunatila Nge dibundu yayi na yina beto ke kanga lukutakanu yayi mpe campagne yayi na yisi ya bendele ya Yesu Klisto, Nganga-Nzambi ya Ntete ya Nzambi ya kukusa, Emmanuel, kele ya kutelama, vumbukaka

na lufwa, ke zinga ntangu nyonso samu na kusala bisambu; Mvwandulu ya Yandi ya nene ntangu yayi na beto, Ngolo ya Yandi ya santu na zulu ya beto samu na kusala beto kumona ba-vision, ba-profesi, kutentika maboko na zulu ya bambevo. Ndinga ya Nzambi ya kukondwa lenda ata mbala mosi ve kuvutuka na Yandi ya mpamba. Mu ke bedisa konso mpeve ya yimbi ya kimbevo, ngolo nyonso ya disumu, ntembe nyonso, na Nkumbu ya Yesu Klisto, ti yawu kupumbuka na bantu mpe ti bawu kubeluka.

¹⁶⁸ Sakumuna bampangi yayi milongi, Mfumu, na yina ba me vukana kintwadi na ntima mosi mpe dibanza mosi, mpe mindimi nyonso ya dibuundu. O Nzambi ya Ngolo nyonso, na Middletown ya nene yayi, na Ohio, fidisa reveil na manima ya yayi, Mfumu, yina ke komba lweka yayi na lweka yankaka, kuvukana ya mikwa, Mfumu, na ba-nerf ya mpusu. Mpe ti ngolo ya Nzambi kutelemisa dibuundu mosi ya nene ya kuvukana awa na mbanza yayi yina ke komba, kifwani ya dibuundu, bisika nyonso na yinsi, ti bantu lenda kwiza kota na mbanza yayi samu na kumona ngolo ya Nzambi. Pesa yawu, Mfumu. Belusa bambevo mpe bantu ya mpasi, vuukisa bayina me zimbana, mpe kuzwa nkembo samu na Nge mosi.

¹⁶⁹ Pesa yawu, ti bamuswale yayi mpe mwa mabuki yina kele na zulu awa . . . Mu ke sambila, Mfumu, ti Mpeve-Santu na zulu ya beto, mpe na kati ya yinzo yayi yina ke na kukusaka beto, ti mosi na mosi ya yawu kuvwanda mbote. Ya kele ya kusonama na kati ya Biblia ti ntangu Israel vwandaka na nzila ya kisalu, na nzila ya bawu na yinsi ya nsilulu, ti Mubu ya Mbwaki kangilaka bawu nzila. Mpe mosi ya misoniki tubaka, “Nzambi talaka na yisi na nzila ya Dikunzi ya Tiya yina mpe Mubu ya Mbwaki kuzwaka boma mpe vutukaka manima, mpe Israel kwendaka na yinsi ya nsilulu yina ba silaka.”

¹⁷⁰ Mpe ntangu yayi, ya kele na kati ya Biblia, ya me sonama, “Munu na zulu ya nyonso ke zola ti nge mvwama na mavimpi.” Mpe ntangu bamuswale yayi ke kuma na bantu, kisika Satana me tula Mubu ya Mbwaki na ntwala ya bawu, ti Nzambi kutala na yisi na nzila ya Menga ya Mwana ya Yandi mosi, Yesu Klisto, mpe kubedisa konso kimbevo samu na bayina me lenda ve kukuma awa; mpe ti kimbevo kukenda mpe tala boma na Ndinga ya Nzambi mpe nsilulu ya Nzambi mpe kupakulama ya Nzambi, mpe ti bantu kuluta na nsilulu ya mbote ya mavimpi ya mbote yina mpe ya ngolo. Pesa yawu, Mfumu. Mpe beto me pesa yawu nyonso na Nge, na Nkumbu ya Mwana ya Nge ya luzolo, Mvulusi ya beto Yesu Klisto. Amen.

¹⁷¹ Dibuundu, na Yandi yina zaba beto nyonso, na Yandi yina vumbulaka beto na kuvwanda difwa ya Yandi na yinza, na dibuundu ya Yandi, ti balusakumunu ya nene ya Nzambi kuvwanda na zulu ya beno tii beto ke kutana dyaka. Lukutakanu ya beto yina ke landa, mutindu mu me zaba, ke vwanda na

tabernacle, Lumingu na suka, na Lumingu ya Paki na suka. Na manima mu ke . . . kuna mu ke kwenda na Illinois. Lusakumunu na beno, beno kwenda na mabundu ya beno, beno kwenda na mabuundu ya mbote yayi, beno bumba bantima ya beno kintwadi. Beno vwanda na Ndinga ya Nzambi! Beno zinga samu na Yandi, samu ti bima ya boma kele na ntwala ya beno, beno bambuka moyo na yawu!

172 Tii beto ke kutana, beto telama mpe beto yimba:

Mu zola Yandi, mu zola Yandi
Samu Yandi zolaka munu ntete
Mpe futaka mpulusu ya munu
Na yinti ya Calvaire.

173 Ntangu yayi, na buzitu nyonso, beno pesa mbote na muntu na manima ya beno, na ntwala ya beno, mpe na balweka ya beno.

Mu zola Yandi . . .

Muntu nyonso ntangu yayi.

. . . Mu zola Yandi
Samu Yandi zolaka munu ntete
Mpe futaka mpulusu ya munu
Na yinti ya Calvaire.

174 Ntangu yayi na maboko ya beno na zulu na Nzambi, kieleka na ngolo ntangu yayi, ti muntu nyonso kuwakisa ndinga ya yandi.

Mu zola Yandi, mu zola Yandi
Samu Yandi zolaka munu ntete
Mpe futaka mpulusu ya munu
Na yinti ya Calvaire.

175 Beto kulumusa yintu ya beto ntangu yayi.

Tii beto ke kutana! tii beto ke kutana!
Tii beto ke kutana na makulu ya Yesu;

Beno bambuka moyo, mingi ya beto ke kutana dyaka ve tii kuna.

Tii beto ke kutana! tii beto ke kutana!
Nzambi vwanda na beno tii beto ke kutana
dyaka!

176 Ntangu yayi beto yimba na kati ya yinwa. Pasteur ya beno. Mpangi Sullivan, tii beto ke kutana, mpangi ya munu ya bakala.



NSAMBULU YA JEZABEL KNG61-0319
(Jezebel Religion)

Nsangu yayi ya Mpangi William Marrion Branham, kulongamaka na Kingelesi, na Lumingu na manima ya midi, na kilumbu ya 19 ya Ngonda ya tatu, na mvula 1961, na National Guard Armory na Middletown, Ohio, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org